

طائر الصق

مسرحية كوميدية للأطفال من ثلاثة فصول

تأليف

محمود النبوي حجاج

الطبعة ٠ - عام ٢٠٠٤

بِسْمِ اللَّهِ الرَّحْمَنِ الرَّحِيمِ

الإهداء

إلى ابنتي

المؤلف

محمود حجاج

كتبت هذه المسرحية وسن ابنتي هبة الله أربعة سنوات عام ١٩٨٣
لأنني أكتشفت فيها موهبة في التمثيل ولكن ...

الشخصيات حسب الظهور

- هبة : طفلة بين العاشرة والخامسة عشر
- الطائر : طفل أو طفلة أو رجل السن غرمهم ...
- نور : شاب بين العشرين ويستطيع الغناء
- مصطفى : طفل أي سن
- على : طفل أي سن (من مجموعة مصطفى)
- مريم : طفلة ذكية أي سن (من مجموعة مصطفى)
- مجموعة أطفال : أعمار مختلفة (من مجموعة مصطفى)
- أصوات حسنة : العدد يتراوح بين ثلاثة إلى خمسة
- عصابة ١ كلاصيمو : رجل ضخم الجثة ...
- عصابة ٢ بلاليمو : رجل ضخم الجثة
- عصابة ٣ شلاصيمو : رجل ضخم الجثة
- عصابة ٤ شمهر أبو ريحة : رجل ضخم الجثة ...
- علية : طفلة أي سن ...
- حابي وسابي وبابي : ثلاثة أقزام من مجموعة علية
- نجوى : طفلة أي سن من مجموعة علية
- نوسه : فتاة في العشرينات ... جميلة وتستطيع الغناء ..
- مظموظ : طفل يتميز بالبدانة المفرطة .. أي سنن ...

حنطوط : طفل يتميز بالبدانة المفرطة .. أي سن ...
بظبوط : طفل يتميز بالبدانة المفرطة ... أي سن
غاوي حادي بادي كرمب زبادي : طفل رفيع مع مجموعة مظموظ،
ذكي
فتحية : فتاة فوق العشرين ... ترقص وتغني
حسنات : فتاة فوق العشرين .. قوية وضخمة ترقص وتغني
نجدية : فتاة أي سن - مجموعة فتحية هي وحسنات .
مجموعة فتيات : أعمار فوق العشرين لتكوين فرقة فتحية يرتدين
ملابس شرطة.
اللس : طفل أي سن
المأمور : فتاة جميلة من مجموعة فتحية ...
الشاويش : طفل أو رجل أي سن

الفصل الأول

تفتح الستار على حديقة تقف فيها الطفلة هبه، وخلف شجرة في عمق المسرح يقف طفل (أو طفلة أو رجل) يرتدي رأس طائر وجناحين وكأنه تمثال لا يتحرك. يراه الجمهور ولا تراه هبه

(تحدث هبه نفسها قائلة) :

هبه : لازم ألاقى اللي قاللى عليه أبو الهول في الحلم إنه موجود هنا في الجنينة .. أنا حلمت بأبو الهول وقال لي إن فيه في الجنينة دي كنز، وطبعاً مش معقول أبو الهول كذاب. أنا دورت عليه في كل حنة مش ناقص غير إني أحفر وأدور ورا الشجرة اللي هناك دي.

تشير إلى شجرة يقف خلفها طائر يبدو ريشه من خلف الشجرة للجمهور ولا تراه هبه وتضيف) :

هبه : حاحفر ورا الشجرة وأشوف .. لازم ألاقى الكنز قبل مصطفى وباقي الأولاد ما يوصلوا وما أعرفش أدور ولا أعمل أي حاجة. تدور حول الشجرة مرة ويدور الطائر معها ثم تقف وتقلب يديها مندهشة وتقول :

هبه : الريش ده جه منين، هو الشجر بيطرح ريش اليومين دول ؟
(تشد ريشة فيصرخ الطائر من الألم ...)

الطائر : آه

(تقلب هبه يديها مندهشة وتقول

هبه : يا سلام سلم هو الشجر بيتكلم ...

(ثم تشد ريشة ثانية)

الطائر (يصرخ متألماً) : آه .. آه مين بيشد ريشي ؟

مسرحية طائر الصدق : محمود حجاج

(يخرج الطائر لهبه التي تبتعد مذعورة وهي تقول معذرة في خوف) :
هبه : مغلش يا عم يا طائر .. سامحني ماكنتش أعرف إني بأنتف ريشك ..
إيه ده يا ماما !! هو أنت بتتكلم زينا .. ؟
(تستعد للجري ولكن الطائر يوقفها بأن يقف في طريق خروجها من المسرح وهو يقول) :

الطائر : ما تخافيش مني يا هبه أنا مش حاذيكي
(يتحسس مكان الريش المنتوف .. ثم يضيف) :
الطائر : صحيح إنتي نتفتي ريشي لكن أنا مش حاذيكي.
(هبه تضع يديها في وسطها بغرور وتقول) :
هبه : وعازي مني إيه ؟
الطائر : أنا مش عايز منك حاجة إنتي اللي عايزه مني.
هبه (مندهشة) - أنا عايزة منك إنت ؟
الطائر : أيوه إنتي عايزة مني ..
هبه : وحاعوز منك إيه ... ؟
الطائر : مش إنتي كنتي بتدوري على الكنز ... ؟
هبه : الكنز .. أيوه كنت بأدور عليه .. (تغني) بأدور عليه ... بأدور عليه
الطائر : خلاص .. خلاص أنتي حتغني عليا
هبه : خلاص إيه ؟ أنت طلعت لي منين صحيح أنت مسحور ؟
الطائر :
هبه : (بعد لحظة تفكير) - انت عارف مكانه ... عارف مكان الكنز ؟
الطائر :
هبه : (في فرح) - أنت عارف مكانه .. طيب أنت طائر طيب والله، وإين
حلل حتدلني عليه وأنا حافك لك السحر (تتدلل) دلني عليه الله يخليك وأنا

ليك عليا يا عم. عمري ما حانتف ريشك تاني طول ما إنا عايشة على وش الدنيا .. وأفك لك السحر وإرجعك بني آدم تاني

الطائر : سحر إيه وبتاع إيه .. أنا مستعد أدلك على الكنز، بس أسمعني أنا مش مؤذي لكن حاجة واحدة بس تخليني مؤذي

(يتحسس الطائر مرة أخرى المكان الذي نفتت هبه الريش منه ويضيف ...)

الطائر : حاجة واحدة بس

هبه : وأنا مالي خلصني ودلني على الكنز

الطائر : استني بس ... لازم أقولك أن اللي يخليني مؤذي هو الكذب اللي يكذب قدامي أضربه على طول وفي حالتك إنتي ببقى الكنز كمان حيطيببيير ..

(يخرج الطائر من تحت أحد جناحيه يده كمن يحذر، ويكمل حديثه) :

الطائر : أضربه بالقلم على وشه واللي أضربه ثلاث مرات ما يشوفش الكنز أبداً .. أبداً .. أبداً.

هبه : ما تخفش أنا عمري ما حاكذب عليك أبداً أبداً أبداً .. دلني أنت بس على الكنز ومالكش دعوة

الطائر : مش بالسرعة دي ... بعد ثلاث أيام اسأليني عليه .. طبعاً ده إذا قدرتي تقعدي ثلاث أيام من غير كذب قصدي من غير ما تكذبي ..

(هبه تنظر للأمام وللخلف وهي تقلب يديها وتحدث نفسها) .

هبه : طب دي حأعملها إزاي ... اقعد ثلاث أيام من غير ما أكذب، مش معقول الكلام ده، دا أنا بأكذب وأنا بأكذب دا أنا كذابة على طول.

الطائر : وفيه شرط كمان

هبه بنفاز صبر : شرط كمان .. إيه هو بالمرّة

الطائر : انك ما تقوليش لحد اني موجود

هبه : إزاي ؟ طيب ما همه كلهم حيشوفوك

الطائر : لا مفيش حد حيشوفنى مفيش حد يقدر يشوفنى غيرك، وعلى الشرط ده مش مهم تنفذه المهم عندي أنك ما تكذيبش.

هبه : يعني أنا بس اللي أقدر أشوفك وكمان عايزني أكذب من أولها وبتقولني ماتكذيبش. طب أقول لهم ايه عليك لو سألوني ؟

الطائر : أيوه .. أيوه .. آمال أنا. عمال أقول لك إيه من الصبح .. إسكتي بقي دلوقتي أحسن أصحابك جايين.

هبه : اصحابي جايين ... همة فين دول

(تتلفت هبه حولها باستغراب لأنها لا ترى أحدا ثم تقول ...)

هبه : أنا مش سامعة حتى صوت حد جاي ولا حاجة

(يتراجع الطائر للخلف ويختفي خلف الشجرة مرة أخرى في حين تقول هبه في سخرية ...).

هبه : فين أصحابي دول عامل لي نفسك زرقاء اليمامة علشان يعني ما أنت طائر وأنت ولا طائر ولا حاجة .. أنت بس متنكر في صورة طائر وبابن عليك ولا بتشوف ولا بتسمع ولا أي حاجة .. الله أنت رحت فين يا زرقاء ..

يقطع حديث هبه صوت من خارج المسرح لمجموعة أطفال يتصايحون ويضحكون، ويدخلون المسرح من الجهة اليمنى وفي نفس الوقت ومن الجانب المواجهة لجهة دخول الأطفال يدخل نور مرتديا ملابس تنكرية ممكن أن تكون ملابس (بلياتشو) يتأمل نور الأطفال الذين ينظرون إليه وهم يقتربون من بعضهم البعض ويلف نور حولهم لفة كاملة.

نور : (مغنيا مع طبلة) :

الحقوا وبرقوا الحقوا برقوا .. واشهقوا وازعقوا .. برقوا الحقوا .. لحسن
تغرقوا الحقوا زعقوا .. عشان تلحقوا تسبقوا .. تسبقوا .. شوفوا وازعقوا
واصدقوا اصدقوا .. الحقوا وبرقوا الحقوا .. برقوا وادصدقوا

مسرحية طائر الصدق : محمود حجاج

يخرج نور من الناحية التي دخل منها الأطفال وهو يكرر نفس العبارات ويخفت الصوت تدريجيا حتى يختفي تماما.

(يتابع هبه، وباقي الأطفال نور وهو يغادر المسرح وهم يستغيرون ويقلده أحد الأطفال بعد أن يخرج ثم يعود وباقي الأطفال يضحكون في حين تلتفت هبه إلى الطائر المختبئ خلف الشجرة، وتقول له معذرة :

هبه : آسفة جدا يا زرقاء كنت فاكركه أنك بتكذب على

(يخرج الطائر رأسه من خلف الشجرة ويقول ..) :

الطائر : ليه هو أنا زيك ... كذاب

(ينظر مصطفى ومريم وعلى وباقي الأطفال ناحية هبه مندهشين وهم يقلبون

بصرهم بين الجهات الثلاث .. الجهة التي خرج منها نور والجهة التي تقف

فيها هبه والجهة التي تنظر إليها هبه وهي تتحدث مع الطائر

مصطفى : هبه يظهر اتجننت يا ولاد !! هبه بتكلم روحها

على : هبه ورمت ...

مريم : إيه ورمت دي .. كل حاجة عندك ورمت ... ورمت

(مصطفى موجهها حديثه إلى هبه بعد أن يشير للآخرين بالصمت)

مصطفى : إيه يا هبه إيه الحكاية انتى بتكلمي نفسك والا إيه ... تنظر هبه

إليهم ثم تمشي في اتجاه على وهي تحدث الطائر

هبه : طيب أنت مستخبي ليه مادام محدش يقدر يشوفك غيري (يتراجع على

أمام هبه حتى يصطدم بظهره بالحائط وتهوشه هبه بأنها ستضربه ثم تستدير

لباقي الأطفال وهي تقول ...)

هبه : آه .. بأكلم نفسي أنا حرة ... اكلم نفسي

تبدأ في الغناء

اكلم نفسي اكلم نفسي

أكلم ايدي اكلم رجلي

(تفقز في الهواء وقد أعجبتها الفكرة، ورأت استجابة الأولاد معها)
 هبه : اكلم بحري اكلم قبلي أجول سلامات ويلح أمهات
 تشير بيدها إلى مصطفى وتقول :
 هبه : يا واد يا حرات
 (يمك مصطفى بيد هبه وهو يشير إلى باقي الأطفال للانضمام إليهم)
 ويقول مغنياً هو أيضاً ...
 مصطفى : أنا عيني فداك
 (يدخل على في الدائرة وهو يقول)
 على : وورمت معاك
 (تمسك مريم بيد على وهي تضحك وتقول)
 مريم : وورمت كمان
 هبه : أنا أصلي أصيل وبلادي النيل ويقول مواويل .. وأرتاح لغناك
 مصطفى : وأنا من أسبوط جرجا وفرشوط .. مزروع بلوط في الأرض هناك
 على : وأنا من ورماني حب الرمان وحا غني كمان .. بس أبقي معاك
 مريم : أصلنا حلوين لا مش وارمين مين زينا مين كلنا وياك
 جميع الأطفال معا : كلنا وياك كلنا وياك خطوتنا معاك ربنا يركاك
 على : كلنا وارمين كلنا وارمين مين زينا مين
 (يضحك جميع الأطفال ويصفقون لعل في حين تدفعه مريم في كتفه)
 مريم : وارمين ثاني ...
 (يصفق الطائر وهو يضحك بصوت غريب مبتكر فتنظر هبه إليه وتقول)
 هبه : وأنت مالك أنت بتضحك ليه أنت ؟
 مصطفى : (مشيراً إلى هبه) : هبه اتجننت ثاني وبتكلم روحها ...
 هبه : (للطائر) وبعدين لازم أقولهم حاجة دول
 مريم : يمكن عايزة تغني لنا غنوة ثانية

مسرحية طائر الصدق : محمود حجاج

الطائر : أوعي تكذبي
(تنظر هبه إلى على وتتجه ناحيته وهى تحدث الطائر وتقول) :
هبه : يعني أقول لهم أنك موجود؟
(يشير على إلى نفسه وهو غير مصدق ما يحدث ثم يقول .. وهو يتراجع)
على : لا أنا وارم على الآخر، مش ناقصك كمان تطلعي الحبة اللي فاضلين
وارمين فيكي عليا
الطائر : قولي لهم أي حاجة الا الكذب .. والا...
(يشير الطائر بيده)
(وهى لا تزال تنظر إلى على)
هبه : يعني حاسل ايه دلوقتي أنت حتضربني والا ايه
على : انتي حتتقلبي عليا .. يا وارمة .. آه أضربك وأورمك كمان
الطائر : اذا كذبتى طبعاً حاضريك
هبه : (وهى تقول تنظر الى على) : أعمل إيه ... هه أعمل إيه
على : ما تشوفوا لكم حل مع الوارمة دى
مريم : عيب يا على كل حاجة عندك وارمة وارمة
مصطفى : بس يا على استنى لما تشوف ايه الموضوع ...
(يتجه إلى هبه وهو يقول ...)
مصطفى : أيه الحكاية يا هبه .. دى كذبة جديدة عايزة تقوليها لنا والا ايه ..
؟
هبه : ولا كذبة ولا حاجة.
(يخرج الطائر يده من تحت الجناح ويشير به إلى هبه محذرا)
(تنقل هبه نظرها بين الطائر ومصطفى وعلى ومريم وهى تفكر ... ثم تقول
أخيرا)
هبه : أنا باكلهم زرقاء

(تضيف وهى تتحدث إلى الطائر .ولكن تواصل تقدمها نحو علي، المنسحب
 في حركة دائرية علي المسرح)
 هبه : أنا ماكذبتش
 مصطفى (مندهشا) : مين يا أختي زرقاء ... فين زرقاء دى رخره ...
 أنا مش شايف حاجة هنا غيرنا احنا
 (يخط كفا بكف ويضيف ...)
 مصطفى : الشلة جرى ليها ايه واحد يقول لي ورماني ومش عارف ايه ...
 والثانية تقول لي زرقاء ... العيال دى اتجننت والا ايه يا مريم ...
 (ترفع مريم كتفيها مستغربة في حين ترد هبه قائلة) :
 هبه : مش مهم أنت تشوفها ... كفاية أنا شايفها
 مصطفى : هبه دي عمرها ما حتبطل كذب
 (يختفي الطائر من على المسرح وتتلقت هبه حولها باحثة عنه ثم تقول
 ()
 هبه : عال أهو مشى .. علشان الواحدة تتسلى وتعرف تتجيب في الكذب ...
 (يظهر الطائر فور نطق هبه بكلمة الكذب ويظهر لها اليد الخشبية محذرا ثم
 يعود ويخرج مرة أخرى .. تتساءل هبه) :
 هبه : سمعني إزاي ده ؟
 (يلتفت الأطفال حول مصطفى يسألونه مستفسرين منه عن ما يحدث فيقول)
 مصطفى : فرکش
 (يتوزع الأطفال في أرجاء المسرح ويدخل نور مرة أخرى بملابسه العادية
 دون أن يلحظه أحدا من الموجودين على المسرح .. تقول هبه لنفسها)
 هبه : لازم اوزعهم علشان أعرف آخذ وادى مع الطائر ...
 (ينظر مصطفى لهبه مستغربا ثم يقول) :
 مصطفى : هبه مالك يللا نلعب

مسرحية طائر الصدق : محمود حجاج

هيه : لأ .. لأ نلعب ايه .. أنا بالي مشغول شوية يا مصطفى بص
روحوا لعبوا هناك (تشير بيدها في الاتجاه الذي يقف فيه نور فتسكت
وتشير الى مصطفى أن ينظر اليه وتقول) ...

هيه : مين داااا ؟

(مصطفى يتقدم ناحية هيه وهو يقول)

مصطفى : مش عارف .. تيجي نسأله ؟

هيه : أسأله أنت ؟

(يتقدم مصطفى ناحية نور حتى يقف خلفه ويجذبه من ملابسه ويقول)

مصطفى : حضرتك مين وعازب مننا أيه ...؟

نور : أنا مين ؟ أنت مش عارفني ؟.....؟

مصطفى : لا .. مش عارفك .. ايه جريمة دي رخرة ؟

نور (لباقي الأطفال) : انتم مش عارفني ؟

الأطفال (بصوت قوى وهم ينضمون لمصطفى) : لا

نور (مغنيا) : أنا نور زي البلور وبألف وأدور في الجنان أعرف الغاز

والعجب جميز مين فيكوا فإاز حيكون باين

هيه : طب قول لينا لغز

نور : أقول لكم لغز أقول لكم لغز

احنا وقدنا وكمان نصنا

ميه يا شاطرين، حلوها قوام

نبقى احنا كام ؟

إذا واحد حل نسقف لـه

ونقول له يا عم ونهتف له

الأطفال : (كلهم في صوت واحد) :

مش كافي يا نور مش كافي

18

نور : خذى الجنيه حلال عليك ...

على (متضايقا) : ايه يا عم نور دى فزورة صعبة قول لنا حاجة سهلة شوية
(يدخل من الجانب الأيسر أربعة رجال يرتدون ملابس مخططة بالعرض
باللونين الأسود والأبيض ويختفون خلف أحد الصخور الكبيرة عندما يرون
نور والأطفال فلا يلحظهم أحد من الواقفين على المسرح ولكنهم مكشوفون
للجمهور ... يتهامسون وهم يشيرون الى نور .. تقول هبه وهى خارجة من
المسرح من الجهة التى يقف فيها الرجال الأربعة) :

هبه : أنا رايحة أدور على نوستى وحجيب بجنيهك بسبوستى ..
(مصطفى : يا هبه استنى معانا ... يا هبه ... سيبك من نوسه دى دلوقتى
... يا هبه .. شيلي لي حطة بسبوسة طيب
(تخرج هبه بعد أن يلفت انتباهها منظر الرجال الأربعة، المختفين خلف
ديكور لصخرة موضوعة في جانب الحديقة ... ويتوقف مصطفى عن متابعة
هبه ويعود الى المجموعة وهو يقول مغنيا) :

مصطفى : استنى يا هبه يا أروبة .. ده جنيه حقيقى يا لهلوبه
(تعود هبه وهى تتسحب خلف اللصوص الأربعة وتقف على مقربة منهم
بحيث تستطيع أن تسمع حديثهم ... وفي نفس الوقت يأخذ نور باقى الأطفال
إلى الجهة الأخرى من المسرح وهو يقول)

نور : تعالوا ورايا

(تتقافز الأطفال حول نور وكل منهم يرفع أصبعه يقول نور) :

نور : عايزين فوايزر سهلة علشان تأخذوا جوايز وتفلسونى ؟.

الأطفال : ايوده ايوده هية هية

نور : حاضر تقدورا تقولوا لى ايه اللى اسمه سيد وايوده من الألبان .. ؟
(يلف الأطفال حول بعضهم البعض .. يفكرون في الحل ... ويعود مصطفى
الى على ويسأله :

مصطفى : هيه ايه الفوزرة يا على ؟

على : هوه انا اخلص من هبه تطلع لى انت .. مش عارف ... هوه أنا فاهم حاجه خالص .

طفل (يرد على مصطفى) : ايه اللى اسمه سيد وابوه من الألبان ؟

يفكر مصطفى قليلاً : ثم يقفز في الهواء فرحاً وهو يقول

مصطفى : سيد قشطة سيد قشطة عايز جايزة جنيه أيدك عليه

نور : حاضر . حاضر . خد الجايزة

تتقدم طفلة بدينة من نور وتقل له ..

الطفلة البدينة : يا أستاذ يا أستاذ ... يا أستاذ

يلتفت نور اليها ويقول :

نور : نعم

الطفلة البدينة : عايزة أدلع سيد قشطة، أقول له ايه ؟

نور : قولى له ... يا قشوط .. يا متخخ ...

على : قولى له يا وارم.

مريم : يا أستاذ ... مش معقول كدة. قل لنا فوزرة سهلة نعرف نحلها

نور: أسهل من كده مفيش أرى ايه مثلاً ؟

مريم : زى ليه بنتغطى بالحاف ؟ مثلاً .. زى

نور : لحاف .. لحاف إيه ... اسمعوا دى ... ايه اللى ليه ثلث عيون ورجل

واحدة وبيحجب الخير للناس .. ؟

الأطفال : مش عارفين مش عارفين ...

نور : حاولوا شوية يا حلوين ..

الأطفال : مش عارفين مش عارفين ..

نور : غلب حماركم غلب

الأطفال : ايوه غلب حمارنا ..

نور : طيب ليها ثلاث تلوان أحمر وأصفر وأخضر

الأطفال : مش عارفينمش عارفين ...

نور : إشارة المرور يا شطار

(يلاحظ نور أن الأطفال فقدوا اهتمامهم في اللعب معه فيقول مغنيا)

نور - أحسن حل تعالوا نغنى اسمعوا منى وقولوا ورايا

واقفوا في صف وغنوا معايا نعمل قطر يروح ف بلاد

يللا لأنى ورايا ميعاد مين فيكو شاطر في الجغرافيا

بالذوق يفهم أو بالعافية

(يرفع كل الأطفال أصابعهم ويتابع نور)

نور - تقدر أنت تقول لى يا شاطر أين تقع اوروبا ... مذاكر؟

مصطفى - هي وقعت يا خبر امتى ما حدش قال لى ليه ؟

علي : أصلها ورمت فوقعت

مريم - مسكينة واتكسرت فيها حاجة ؟

نور - أوروبا أوروبا مش عارفينها ؟

الأطفال - لا عارفينها ... آه عارفينها بس ادينا جنية ونقول لك

مصطفى : أيوه أيوه كل واحد جنية علشان نسيبك تعمل لنا فيها شادية ..

مريم : انا عايزة اتنين جنية يا بيه .. أصل حضرتك مش عارف وأنا لازم

افهمك انا عايزة اتنين جنية ليه.

(تدعى مريم البكاء وتكمل بطريقة تمثيلية)

مريم : أصل أمى عيانة وأبويا ميت والدكتور قال انه لازم ليه لأبويا يعني

عملية كبيرة باتنين جنية علشان يعيش

نور : (ضاحكا) : أبوك ميت وعايز عملية باتنين جنية

مريم : آه .. ميت من الجوع .. ايه .. ايه فيها ايه دي

الأطفال : (بصوت واحد) : قول لنا احنا مش عارفينها

فبينها اوروبا قولها قولها

نور : ايوده يا شطار راح أقول احنا في قارة اسمها ايه

الأطفال (معا) : افريقيا يا أستاذ أفريقيا

نور : لما نعدى البحر الأبيض نلقى بلاد الروم وفينيقيا

هيه اوروبا هناك في شمال عارفين طبعا الاتجاهات

الأطفال (يقلبون أيدهم كمن لا يفهم) :

عارفين طبعا الاتجاهات الاتجاهات؟ الاتجاهات ؟

نور (وهو يمثل الاتجاهات):مش عارفينهـا طيب تقفوا تخلوا الشمس

يمينكم

يبقى شمالكم شايفاد عنكم يبقى يمينكم الشروق

يبقى شمالكم الغروب والجنوب حيكون في الخلف

(يقف في نفس الوقت طفل يحاول أن يقلد نور مشيرا بيديه في الاتجاهات

التي قالها نور فتتشابك يديه ورجليه حتى يقع على الأرض عندما يحاول النظر

للخلف ينظر اليه نور مشفقا لكنه يقع كما وقع الطفل وتهلل الأطفال حوله

فيقول وهو علي الأرض يانسا) :

نور : أنا ورايا ميعاد .. حأبقى أرجع لكم تاني بعدين ثم يحدث نفسه هامسا :

نور : أمشى قبل ما تجننوني

يلتف الأطفال حوله وهم يرجونه أن يبقى معهم فترة أطول فيقف نور

معهم وهو يشرح لهم سبب انصرافه، ويشرح لهم إحدى الألعاب التي يمكن أن

يلعبوها أثناء غيابه وفي نفس الوقت تتقدم العصابة التي ترتدي ملابس

المساجين المتعارف عليها إلى قرب منتصف المسرح ويقول أحدهم ..

عصابة (١) كلاضيمو : كويس أن نور مع شوية العيال دول نقدر نخطفه

دلوقت

عصابة (٢) بلاليمو : لا .. أحسن حد من الأطفال يتعور ويخر دم

عصابة (٣) شلاضيمو : يخر دم يخر دم واحنا مالنا
عصابة (٤) شمهر : لا ... لازم نشد انتباه العيال بعيد الأول وبعدين نخطفه
....

عصابة (١) كلاضيمو : صح .. نشد انتباههم بحبل بعيد ونخطفه.
عصابة (٢) بلاليمو : لا أحسن حد من الأطفال يتعور ويخر دم
عصابة (٣) شلاضيمو : يتعور ... يتعور واحنا مالنا
عصابة (٤) شمهر : لا .. يا غبي حبل إيه .. احنا نشد انتباههم بالذوق
عصابة (١) كلاضيمو : أيوه صح بالذوق روح يا شلاضيمو هات الذوق من
شنطة العدة

عصابة (٣) شلاضيمو : من العدة من العدة واحنا مالنا .
عصابة (٢) بلاليمو : لا أحسن حد من العدة يتعور ويخر دم
عصابة (٤) شمهر : أنا إيه اللي وقعنى مع عصابة زيكم
(يخرج نور من المسرح ويترك الأطفال وفي نفس الوقت تنمظر هبه ناحية
خارج المسرح وتنادي

هبه : يا نوسه يا نوسه .. لا مش هيه
تخرج هبه من مخبئها وتجرى ناحية الأطفال وهى تصيح وقد سمعت كل ما
دار بين أفراد العصابة .. مما يلفت نظر أفراد العصابة فيعودون إلى مخبئهم
وتقول هبه للأطفال)
هبه : يا مصطفى ... يا نور يا أطفال

مصطفى : فيه ايه فيه ايه ... الجنيه وقع منك ؟..
هبه (هامسة) : لا .. جنيه إيه دلوقتى .. فيه عصابة جاية تخطف نور فين
نور ... لازم احذرده .

مصطفى : عصابة .. ها ها .. عصابة إيه ..
(يلتفت لباقي الأطفال ويقول)

مسرحية طائر الصدق : محمود حجاج

مسرحية طائر الصدق : محمود حجاج

يا جميل يا جميل ودينى هناك

وفي نفس الوقت يخرج الطفل "علي" من جيبه تليفونين (موبيل) ويطلب في واحد، ويرن الذي في يده الثانية فيقول ويرد علي نفسه) علي: ألو بوليس النجدة (يحرك رأسه للجهة الأخرى ويقول في الموبيل الثاني بصوت مختلف) : أيوه مين عايزه .. مش مهم مين عايزه .. أنا عايزه أنت بايخ صحيح .. بلاش قلة أدب .. طيب اسمع بس نور حيتخطف الليلة هود أنا حاعمل كل حاجة في البلد وحجيب لكم منين صحة وفلوس وحراسة ومرور وشوارع ما فيهاش ولا مطب واحد وكمان عايزين تاكلوا وتشربوا جاتكوا البله يقفل السكة ويخرج جريا خلف الأطفال وهو يقول :

علي : استنوني استنوني أنا باين عليا حأروح ورا الشمس يخرج الأطفال وهم يقولون :

الأطفال في صوت واحد : ودينى هناك .. ودينى هناك

(يخرجون تدريجيا من المسرح وبعد أن تخلو خشبة المسرح تدخل مجموعة أخرى من الأطفال مكونة من بنتين وثلاثة أقزام ... يحجلون جميعهم علي رجل واحدة، إلى أن يصلوا الى منتصف المسرح تقريبا فيتفرقون وتقف البناتان في الجانب الأيسر من المسرح في حين يقف الأقزام الثلاثة في الجانب الآخر وتنادى أحدهم وأسمها عليه

عليه : حابى

(يتقدم قزم منحنيا للجمهور ويقول)

حابى : نعم يا عليه

عليه : (تنادي مرة أخرى) سابى

سابى : نعم يا عليه

عليه : بابى

يتقدم القزم الثالث منحنيا للجمهور

بابي : نعم يا ست عليه

عليه : خنلعب إيه ؟

نجوى : نلعب الأميرة والأقزام السبعة

عليه : ما ينفعش لأن الأقزام دول ثلاثة بس يا فالحه

بابي : نلعب لعبة البياعين دي حلوه قوي

عليه : ماشي حابي أول بيع

حابي متذمرا : اشمعنى أنا كل مرة أول واحد طيب حاضر حابيع إيه يا عليه ؟

عليه : أي حاجة أنت وذوقك

تدخل مجموعة من الأطفال ويقفون مع عليه ويخرج حابي من المسرح وينادي

من خارج الكواليس :

حابي : معايا البرتقان والتين معايا فراولة للحلوين

معايا خيار معايا لفت

نجوي تناديه : يا بتاع البرتقان تعالى من هنا وحوّد عندنا

حابي يدخل المسرح يجر عربة صغيرة عليها فواكه وخضروات ويقول :

حابي : نعم حاضر .. نعم أنا جاي مين نادى هنا في الحى

يقترّب من نجوى وهي تقترب منه وتقول :

نجوى : بكام البرتقان والتين دي ماما عايزه منك لفت

حابي : بلاش خالص عشان خاطرك بلاش راح أبيع لناس حلوين

خيار كوسة وتين أو لفت

نجوى : بكام يعنى عشان مانبت وناخد كيلو والا اتنين

معاك شئ تانى غير التين

معايا ورايا اهم جايين

حابي :

(يحمل السلة ويتابع مغنيا)

حابي : باينكم انتوا مش شاريين وعازية تفاصلى ويايا

مسرحية طائر الصدق : محمود حجاج

(يحاول الخروج فتمسكه نجوى وتقول :

نجوى : شوية استنى نتفاصيل وبين الشاري والبايع

بيفتح ربنا علينا

حابى : أنا مناكف واصلى حزين ما فيش مفاصله ويايا

تعالى واسرحى معايا يا بت يا حلوة الحلوين

(تضحك وتتركة نجوى يخرج عندما تسمع سابى مناديا من خارج المسرح)

سابى : معايا المشط ومراية وفيه للشعر فلاية

(يدخل سابى وفي نفس الوقت يعود حابى بعد أن يكون قد وضع العربة التى

كان يدفعها في عمق المسرح ويقف مراقبا ما يحدث ... وتتقدم عليه من

سابى وهى تقول له) :

عليه : بكام المشط تدينى

سابى : بلاش خالص عشان خاطرك

عليه : بكام نورنى من الأول أنا شارية ومش حفصل

سابى : عشانك انتى مشط بلاش بخمسة قروش وفلاية

عليه (ضاحكة) : فلاية ! ليه مش عايزه بقرشين مشط ومراية

تبيع كدة ليه او ترحل وفى الحالتين أنا الفايضة

(يخرج سابى بعد أن يرفض أن يبيع لها ... ويضع السلة ويعود في نفس

الوقت الذى يدخل فيه القزم الثالث بابى مغنيا على نغمة سريعة راقصة)

بابى : انا البياع انا الللى بأبيع أبيع الحلم والفقاقيع

وبأعرف انا انا أعرف أبيع سلام ليكم سلام للكل

وعندى لعبة فل الفل

(ينفخ في اللعبة التى تخرج فقاقيع ويلتف الأطفال حوله يرددون معه أغنية .)

الأطفال : أنا البياع أنا الللى بأبيع أبيع الحلم والفقاقيع

(تتقدم منه عليه وتسأله)

عليه : بكام اللعبة يا معلـم ؟
 بابي : أنا بابي وباتكلم وأقول بجنيه عشان تحلم
 بدون ماتنام. جنيه سلم وخذ لعبة
 تجذب عليه الأطفال الذين يريدون الشراء بعيدا وهي تقول لهم
 عليه : نفاصل قبلها شوية
 تلتفت الى بابي بعد أن يبتعد الأطفال وتقول له :
 عليه : كده غالية وسعر كبيرر وجملـة بكام دا احنا كتير
 بابي : عشان خاطرك بنص جنيه
 الأطفال (في فرح) : نص جنيه ... هيه هيه .. نص جنيه ... هيه هيه
 يأخذ كل طفل لعبة وينفخون فيها فتخرج فقاقيع كثيرة ما عدا سابى الذى ينفخ
 وينفخ بقوة ولكن لا شئ يخرج من اللعبة فيلتف جميع الأطفال حوله وهم
 يضحكون عليه .. تتقدم عليه وتأخذ منه اللعبة قائلة :
 عليه : مات أعلمك ازاي تنفخها
 تنفخ وتنفخ ولكن لا تستطيع أن تخرج أى فقاقيع ويضحك عليها الأطفال الذين
 يراقبون ويتقدم حابى ويخطف الزجاجـة من يدها ويستخدم شفـاطته وهو يقول:
 حابى : إنتى مش عارفة ... أنا حأوريكم ازاي
 ينفخ فتخرج فقاقيع كثيرة ويصفق له باقى الأطفال وتقول له
 نجوى (في إعجاب) - يا ولد
 بابي : يا لعيب .
 حابى (معجبا بنفسه) : ايه الحلوة دى ؟
 عليه (بغيظ) : وايه يعنى كنت حـأعملها
 (تدخل هيه مندفعة وعندما ترى الأطفال والأقزام تتجه اليهم).
 هيه : ماشفتوش نور؟
 عليه : نور مين؟

سابى : نور مين؟

حابى : نور مين؟

بابى : نو نو ننور مميميين ن ؟

هبه : (مستغربة) : نور.. مش عارفين نور مين ؟

نور : لازم احذره من العصابة اللي عايزين يخطفوه

نجوى (لعلية) : ايه الحكاية دي مالها دي ؟

عليه : مش عارفة باين عليها مجنونة .

(تتجه ناحية هبه وهي تقول لها)

عليه : مالك يا شاطرة .. فيه حاجة ؟

هبه : شاطرة .. شاطرة ايه .. ايه الخيبة دي .. لا.. لا.. لا.. مفيش حاجة غير انكم

لازم تمشوا من هنا دلوقتى احسن العصابة زمانها جاية علشان يخطفوا نور

فهمتى يا شاطرة ؟

نجوى (تنادى عليه) : عليه .. يا عليه

(تتجه عليه اليها متسائلة)

عليه : ايه يا نجوى فيه ايه سيبيني عليها المغرورة دي .

نجوى : انا عرفت .. دي مين .. دي البنت الكذابة اللي فى شلة مصطفى

عليه : آد فعلا أنا كمان افكرتها .. وعايزانا نمشى من هنا علشان كده

اخترعت حكاية العصابة دي استنى يا نجوى انا حاتصرف معاها

(تتجه عليه وهي تشمر يديها ناحية هبه وتقول لها بصوت خافت لطيف)

عليه : احنا هنا بنلعب تلعبى معنا ؟

هبه : اللعب ايه ؟ باقول لك لازم تمشوا من هنا دلوقتى

(تحادث نفسها)

هبه : لما اشخط فيهم علشان يخافوا ويمشوا .. يللا امشوا من هنا حالا بأقول

لكم. مفهوم ؟

عليه : حيلك .. حيلك .. يا ابة .. احنا هنا فى جنينة الحكومة .. ومش
حنمشى .. إيه رأيك بقى ..

هبة : مفيش حاجة اسمو جنينة الحكومة .. انتوا لازم تمشوا، والله
العصابة جاية ورايا

عليه : هية الحكومة، باعت جنينة بحالها ليكى والا ايه .. ؟ يعنى ايه ما
فيش حاجة اسمها الحكومة .. الحكومة حتبيع كل حاجة حتي جناين الأطفال
وأحلامهم

هبة : أيود مشروع استثماري رأس مال اجنبى ..

نجوى : (متدخله فى الحديث) : بللا يا عليه مفيش اى فائدة من الكلام
مع دى .. تعالى نروح نلعب فى حطة ثانية بعيد عنها وعن كذبها ..

هبة : والله أنا ما بأكذب عليك .. زرقاء قال لى ما أكذبش ثلاث تيام
سابى : (بغيط) : لا مش حد شى من هنا .. بزرقاء أو من غير زرقاء مش
حنمشى من هنا

حابى : (مكررا) : أيود مش حنمشى من هنا .. مين زرقاء دي ؟

بابى : (متتهتها) : أيود شمش شمشى شنضلك ... مين زرقاء دي ؟

عليه (مؤيدة) : أيود .. قال الحكومة باعت لها الجنينة قال.

سابى : (بسخرية) : قال الحكومة قالح .. مين زرقاء دي ؟

حابى : (مكررا) : أيود قال الحكومة قال ..

بابى : أيود قال الزلومة قال

عليه : زلومة ايه بس يا بابى انت حتودينا ورا الشمس

عليه : اسكت انت خالص .. أقول لكم احسن نمشى من هنا زى نجوى ما
قالت

تشير عليه إلى المجموعة وتتجه للخروج من المسرح وهى تهز كتفيها
مستهزئة بهبه التي تقف تتفرج عليهم وهم يخرجون خلف عليه ويقلدونها فى

مسرحية طائر الصدق : محمود حجاج

كل حركاتها بطريقة مضحكة .. تضحك هبه ثم تقف حائرة تفكر لكنها تفاجأ
ببابي يعود مندفعاً وخلفه عليه تحاول اللحاق به ولكنه ويقول :

بابي : قال زلومة قال هه

تجرة عليه الى الخارج وهو يحاول أن يتخلص منها ليتخاّنق مع هبه ويضرب
بيديه الهواء ثم يخرج مندفعاً بعد أن يتخلص من قبضة عليه تضحك هبه
ثم تقول لنفسها.

هبه : اخيرا الجنيّة فضيت مرة ثانية اما الحق أحاول أدور ع الكنز ..
(يدخل الطائر ... فترفع هبه كتفيها في يأس في حين يقول الطائر لهبه) ...
الطائر : ما تحاوليش بعد ثلاث تياموبعدين مش انتى بتدورى على نور
...

هبه : وانت عرفت منين .. ؟

الطائر : مش عيب تسألنى سؤال زى ده برضه

هبه : صحيح ما أنت زرقاء .. طب ما تقول لى أدور على نور فين ؟.....

الطائر : لا ما أقدرش أنا مش مسموح لى اساعدك إلا في حاجة واحدة بس .

هبه : ايه هية؟

الطائر : انك ما تكذبيش

(تخرج هبه وخلفها الطائر ويدخل من الجهة الثانية نور يتسحب ومن
خلفه العصابة ... يقتربون من نور ويخرج عصابة (٤) شمهر حبل يكتفون به
نور ويحملوه الى خارج المسرح ويقول عصابة أربعة)

عصابة (٤) شمهر : اقف انت يا واحد هنا اذا شفت البنت شيلها على طول
وهاتها الوكر بتاعنا .. فاهم

عصابة (١) كلاضيمو : أيوه فاهم يا معلمى حمامة

عصابة (٤) شمهر : حمامة ايه ؟

(تدخل هبه ومن خلفها الطائر ... بعد أن يخرج افراد العصابة .. وتلمحهم

هبه فتصرخ .. وينتبه لوجودها عصابة (٣) شلاضيمو فيجرى ناحيتها وكلها

تتفاداه فيسقط على الأرض ويضحك الطائر فتشير له هبه ليسكت وتقول :

هبه : دا بدل ما تساعدنى؟

الطائر : أنت عارفة أنا مش مسموح لى اساعدك إلا ..

(هبه مقاطعه وهى تستعد لهجمة أخرى من عصابة(١) كلاضيمو .

هبه : عارفة .. عارفة بلاش لماضة وسيبنى في اللى أنا فيه

(يتمكن عصابة (٣) شلاضيمو من هبه ويحملها على كتفه ... وتصرخ)

هبه : الحقنى يا طائر .. الحقنى .. خطفوا نور ولو خطفونى ما حدش من

الأولاد حايعرف حاجة عننا يا عم يا طائر ربنا يخليك

تحدث عصابة (٣) شلاضيمو

هبه : -استنى شوية مستعجل ليه مش شايفنى باتحايلى عليه

يقف عصابة (٣) شلاضيمو ويقول لهبه : اصل معلمى

هبه (تقاطعه) : معلمك ايه سيبك منه حنلعب لعبة حلوة بس استنى .

يقف عصابة واحد كلاضيمو وهو يحمل هبه التى تتوجه بحديثها الى الطائر :

هبه (بصوت حزين متهدج) : يا عم يا طائر يا عم .. انا أمانة بين إيديك

قول لأمى واخواتى انى كنت بأحبهم ... الوداع يا طائر .. يعنى مفيش فايدة

انك تساعدنى ... طب يللا يا بتاع العصابة بينا من هنا

يبكى الطائر أثناء حديث هبه ثم يقرر ان يتدخل فيجرى خلف عصابة واحد

وينقره في مؤخرته قاتلا (الطائر : سيب ... سيب هبه ... يا حرامى

يسقط عصابة (٣) شلاضيمو هبه ويصرخ متألما من منقار الطائر ويخرج من

المسرح جريا .. فتجرى هبه خلفه وهى تشير للطائر أن يتبعها وتقول (....

هبه : لازم نلحقه علشان نعرف مخبيين نور فين، ونعرف نجيب كل الأطفال

والبوليس علشان ننقذه ... يللا يا طائورتى ورايا ... ورايا بسرعة .. (تخرج

هيه جريا وخلفها الطائر ويظل المسرح خاليا لحظات .. تدخل هيه بعدها وهى
تجرى وخلفها عصابة (٣) شلاضيمو وهو يعرج وتقف هيه في منتصف المسرح
فى وضع الاستعداد وهى تواجه عصابة (٣) شلاضيمو وتتمكن من أسقاطه على
الأرض بحركة كارائيه سريعة يقع عصابة (٣) شلاضيمو ... وتجرى هيه
خارجة من المسرح فى حين يتمدد عصابة (٣) شلاضيمو متألما ... ثم يقف
ويخرج من الجهة المواجهة للجهة التى خرجت منها هيه وهو يبكي .. وفى
طريق خروجه يصطدم بفتاة فى العشرينات من عمرها تدخل الى المسرح بمشية
راقصة وهى تضع سماعات على اذنيها .. تعتذر الفتاة له ... ولكنه يشوح لها
بيده في ضيق ويخرج) نوسه : فين الأطفال ... أين ذهبوا ؟ ياللهول ؟ تدخل
هيه في حذر وهى تتلفت حولها وعندما ترى نوسه تنطلق جريا اليها وهى تقول
بسرعة (

هيه : نوسه ... نوسه ... نوسه .. انتى فين يا نوسه انتى فين يا نوسه ..
انتى فين يا نوستي ... فيه حاجات كثيرة جدا حصلت
نوسه : على مهلك يا هيه ... على مهلك
(تربت على كتفها وتضيف)
نوسه : على مهلك شوية ... خذى نفسك
هيه : أصل ... أصل .. أصل
(نوسه تلتقط منها الكلمة وتغنى)
نوسه : أصل .. أصل .. أصل احنا مش في فصل
لو كنتي عندك عقل كله قوام يتحـلـل
هيه : بجـد
نوسه : ويجـد بجـد
هيه : ما تقوليش لحد

(تمسك هبه بيد نوسه وهى تضحك وتبدأ نوسه فى الغناء مرة أخرى .. وفى نفس الوقت يدخل الطائر من الجهة الخلفية ويمسك هبه من يدها الخالية ويبدأون فى الرقص مع إيقاع الموسيقى).

نوسه : أصل المسألة إن الحنجلة

تعمل برجلة وتجب زغلة

ما نشوفش الحل

هبه (مندمجة) : أصل .. أصل .. أصل

الطائر : أصل .. أصل .. أصل

نوسه : أصل الموضوع لو فيه ممنوع

وكلام ممنوع كذب وتشنيع

يبقى مفيش أصل

هبه : أصل ... أصل .. أصل

الطائر (بسعادة) : أصل ... أصل .. أصل

يصفق الطائر بأجنحته وتنظر اليه هبه مندهشة لحماسه الشديد

نوسه : أصل الحكايات كلها خيالات

وكلام وسكات وختام سلامات

صبيان وبنات تبقى حكاية فل

تسكت الموسيقى فجأة وتشد هبه يدها من يد الطائر وتنظر إليه بأستغراب ..

وفى نفس الوقت تتسائل نوسه :

نوسه : هية إيه الحكاية بقى يا هبه؟

هبه : هية حكاية واحدة ... دول كذا حكاية .. مش عارفة أقول لك إيه والا

إيه والا إيه

نوسه : يبقى على مهلك واحدة .. واحدة ..

هبه : اول الكنز

نوسه (مقاطعة) - الكنز تانى يا هبه الموضوع ده مش خلصنا منه وقلنا
 ننساه بقى و
 هبه : لا مش حنساد لأنه حيظهر لى بعد ثلاث تيام ده اللى قاله ليا الطائر
 العجيب أقصد ... زرقاء.
 نوسه : وإيه حكاية الطائر العجيب ده كمان .. قلتى إيه زرقاء ؟
 هبه : ايود ... (تشير جهة الطائر وتكمل) ..
 هبه : ده .. ده ... دا كان بيغنى معانا دلوقتى أنت مسمعتهوش ولا إيه ...
 الطائر : أنا قلت لك أن مفيش حد يقدر يسمعنى أو يشوفنى غيرك .
 (يخرج الطائر وهو يغنى) - أصل ... أصل ... باى باى يا هبه
 هبه تشير الى الطائر وتجذب نوسه فى اتجاهه وهى تصرخ (
 هبه : أهود هناك .. أهود خارج هناك أهود انتى مش شايفاه ليه ؟ اشمعنى
 انا بس اللى شايفاه
 (نوسه تدقق النظر فى الجهة التى تشير اليها هبه .. ولكنها لا ترى الطائر ..
 فتضرب كفا بكف وتتجه الى الجمهور وتقول)
 نوسه : فين .. فين .. انتو شايفين حاجة هبه يظهر حتتجنن .
 هبه : والله انا مش مجنونة ولا حاجة ..
 تتجه للجمهور وتسال :
 هبه : أنا بدمتكم مجنونة مش انتم شايفين الطائر معايا ؟
 نوسه : بجد
 هبه : ضاحكة بجد بجد
 نوسه : باتكلم جد.
 (تصرخ هبه عندما ترى أحد أفراد العصابة داخلا الى المسرح)
 هبه : يا حوستى
 نوسه : نوستك جنبك فيه ايه يا هبه؟

(يدخل باقى أفراد العصابة)

هبة : العصابة أهم ... اللي عايزين يخطفوا نور

نوسه : مين نور دا كمان ؟

هبة : نور انتى مش عارفاه ؟

نوسه : لا مش عارفاه

(تمسك هبة يد نوسه وتأخذها الى جانب المسرح وفى نفس الوقت يلمحها

عصابة (١) كلاضيمو فيصرخ وهو يعرج فى اتجاهها)

عصابة (١) كلاضيمو : البنت أهيه

عصابة (٢) بلاليمو : بنت إيه ؟

عصابة (٣) شلاضيمو : بنت إيه ؟

عصابة (٤) شمهر : بنت إيه ؟

عصابة (١) كلاضيمو : البنت اللي سمعتنا وشافتنا واحنا بنخطط، واحنا بنخطف

نور

عصابة (٢) بلاليمو : آه .. هية

عصابة (٣) شلاضيمو : آه ... هية ..

عصابة (٤) شمهر : آه هية

عصابة (١) كلاضيمو : لازم نخطفها قبل ما تبلغ عنا

عصابة (٢) بلاليمو : لازم نخطفها

عصابة (٣) شلاضيمو : لازم نخطفها

عصابة (٤) شمهر : لازم نخبطها قصدى نخطفها

(تبعد هبة عن نوسه وتقرب من العصابة)

هبة : آدى يا ستى حكاية نور ... والعصابة دول

تشير هبة الى افراد العصابة فيمسك عصابة (١) كلاضيمو بيدها ويقول:

عصابة (١) كلاضيمو : مسكتها

(يتقدم عصابة (٢) بلاليمو جريا ويمسك هبه من يدها الثانية ويقول)
عصابة (٢) بلاليمو : مسكتها انا كمان
عصابة (٣) شلاضيمو يمسكها من شعرها : وانا كمان مسكتها
(يلف عصابة ٤ حول هبه وباقى أفراد العصابة ولا يجد مكانا يستطرون
يمسك هبه منه ... فيمسك عصابة (١) كلاضيمو من يده الخالية ويقول :
عصابة (٤) شمهر : أنا كمان مسكتها
تصرخ هبه : الحقينى يا نوسه .. العصابة حتخطفنى
عصابة (١) كلاضيمو : مفيش نوسه
عصابة (٢) بلاليمو : مفيش نوسه
عصابة (٣) شلاضيمو : مفيش نوسه
عصابة (٤) شمهر : مفيش نوسه
نوسه تتدخل وتشتبك معهم بأسلوب الكراتيه وهى تقول
نوسه : لا فيه نوسه ... وحتخلص عليكم واحد واحد
تطرحهم أرضا واحدا بعد الآخر .. فيخرجون جريا وهم يعرجون ويشكون ..
الأفراد الأربعة فى نفس واحد : ايه الظلم ده .. آد يا ورايا
تصافح نوسه هبه التى ترفع يدها كأنها الفائزة فى حلبة المصارعة.

وتنزل الستار

الفصل الثانى

يفتح الستار ويظل المسرح خاليا لحظات يسمع خلالها مجموعة أصوات تردد نغمة واحدة .

الأصوات : يوم أوه إيه ... يوم أوه آه ... (تتكرر)

تدخل الموسيقى بعد ذلك بنفس النغمة بصورة هادئة ثم تزداد مع التكرار ... ثم تبدأ مجموعة من الأطفال يتميزون بالبداة الشديدة في دخول المسرح وهم يديون الأرض بنفس نغمة الموسيقى ورويدا تبطن الموسيقى وتتحرك مجموعة الأطفال بالحركة البطيئة معها حتى تسكت الموسيقى تماما فيجلسون على الأرض وينام أحدهم فورا والأطفال يلبسون ملابس مزركشة وقبعات ملونة ... يشير أبدين الأطفال بورقة فى يده كان يقرأ فيها ويقول.

مظموظ : هية الواو الأول والا الهه يا حنطوز .. حنطوز أنت نمت ..

حنطوز : لا بظبوط هو هه الى نام مش عارف يا مظموظ الواو الأول والا الهه ... الواو الأول والا الهه (مظموظ يرفع يديه ويرميها يائسا ثم يقول : مظموظ : حنطوز ... بظبوط ... اصحى ... هية الهه الأول والا الواو ... قصدى الواو الاول والا الهه

بظبوط : ايه .. ايه .. هو الواحد ما يعرفش ينام شوية

مظموظ : هية الواو الاول والا الهه يا بظبوط خلصنى

بظبوط : دى حاجة سهلة جدا قوى يا مظموظ انت مش عارفها

مظموظ : لا مش عارفها ...

بظبوط : الواو الاول والا الهه ؟ الواو الاول والا الهه متهاى لى ... متهاى لى

مظموظ (مقاطعا) : متهاى لك ايه يا جدع .. يغنى ..

يا بظبوط .. يا بظبوط أنا عايز أعرف بالمظبوط

علشان اكتب كام شخبوط

حنطوز : اسأل غاوي حادي بادي أنا مش عارف
يتقدم ناحية طفل رفيع ويواصل غناءه ...
مظموظ : تعرف انت يا زغنطوط
(يرد عليه الطفل الرفيع مغنيا هو أيضا)
غاوى : عايز تعرف بالمظمبوط اسمى ما هواش يا زغنطوط
اسمى غاوى حادى بادى وحأعلمكم بالنبوت
لو حتموتوا مش راح أموت جاهل مات الجهل يموت
راح أعلمكم قولوا توت
(يردد الأطفال الثلاثة) - توت توت .. توت توت
غاوى : قولوا ورايا او ويايا
يدير لوحة معلقة على الحائط مكتوب عليها الحروف الأبجدية ويقرأها لهم
مغنيا
غاوى : ابث جح .. خذ رز سش صض طظ عغ فق كل منه ولاى
.. تبقى الهه قبل السواو
(يكرر الأطفال معه الأغنية عدة مرات وتدخل هبه مع المرة الثانية وتقف
مست معة لهم وهى تهز رأسها مع النغمة ثم تقول بعد انتهاء الغناء)
هبه : مفيش فائدة عمرهم ما هيتعلموا اى حاجة أنت بتضيع وقتك وياهم
يلتفت مظموظ اليها عندما يسمعها ويقول لأصدقائه
مظموظ : هبه الكذابة جت
تمشى هبه بعصية بين الأطفال الأربعة وهى تقول
هبه : انا مش كذابة
يخرج كل طفل من الثلاثة .. سندوتش من ملابسه ... ويبدأ فى الأكل غير
مهتم بهبه التى تتوقف امام غاوى وتقول له
هبه : أنت جديد .. باين عليك ولد كويس وحتصدقنى .. اسمك ايه ؟ أه غاوي
مسرحية طائر الصدق : محمود حجاج

غاوى مندهشاً مقاطعا : غاوى .. هود أنت أول مرة تشوفيني
هبه (لنفسها) : غاوى ايه ؟ يمكن غاوى كذب زى
ثم (لغاوى) : غاوى ايه ؟
غاوى : حادى بادى
هبه : ايود الشعبة دى عارفها بس أنت اسمك الأول ايه ؟
غاوى وهو غير منتبه لما تقوله هبه لأنه مشغول بلوحة الحروف الأبجدية ...
غاوى : غاويييي
هبه : ايود ... ايود عرفت انت غاوى حادى بادى
غاوى : صح
هبه : صح .. اللعبة دى حلوة أنا عارفها وحنلعبها لو عايز ... بس
الأول قل لى اسمك ايه ما هو أنا ما أقدرش ألعب مع واحد ما أعرفش اسمه ..
غاوى : غاوى ... غاوى ... انت ما بتفهميش والا إيه ..؟
هبه : لا .. لا مش فاهمة .. انت غاوى حاجة ثانية كمان غير حادى بادي
غاوى : لا .. حادى بادى بس
هبه : حادى بادى بس ...
غاوى : لا ... لا نستينى غاوى حادى بادى كرمب زبادى ارتحتي
(تقفز هبه فى الهواء مرحا وتقول :
هبه : أيود عارفة دي الناحية يادى ودى الناحية يادى سيدى
محمد البغدادى شالوا وخطوا وكلوا على آدى
(تشير على مضموظ الذى يعطيها ظهره وهو يأكل بشراهة .. تتركه هبه
وتستدير الى غاوى قائلة :
هبه : بس انت ايه ؟ انت مش عارف اسمك والا إيه

غاوى (بضيق) : يوه ... دى مش كذابة بس دى مش بتفهم كمان .. اسمى
 غاوى. اسمى كده وابويا حادى بادى. وجدى كرمب زبادى كرمب زبادى
 فهمتى

هبة (مندهشة) : اسمك كده ... غاوى وابوك حادى بادى وجدك كرمب
 زبادى يا بنى دى لعبة مش اسم وأكله مع محشى ورق العنب مثلا
 غاوى : ايوه اسمى كده مش عاجبك ... روي كلي ورق خيار
 هبة : يعنى احنا بنلعب باسمك .. لا لا بنلعب بعيلتك كلها ؟ ليه يعنى من قلة
 الاسامى فى البلد ؟

(غاوى يشير الى الآخرين ويقول :
 غاوي : اخيرا فهمت ...

مظموظ (يشير إليه) : سيبك منها وتعالى هنا أحسن تكذب عليك
 هبة (بغيظ) : انا مش بأكذب على حد
 (تقف وهى تبكى فيقترب منها غاوى ويربت على كتفها وهو يقول لها :
 غاوى : بس ما تعيطيش ... متعيطيش .. بس .. بس
 (تستمر هبة فى البكاء فيشخط فيها غاوى بقوة)
 غاوي : بس بقى ولا كلمة ولا نفس ... عارفة إذا اتنفستى .. حاضريك ع
 (تلتفت هبة إليه وهى تضحك وتمسح دموعها وهى تقول لمظموظ :
 هبة : كفاية أكل .. الأكل الكثير مش كويس عليكم
 مظموظ : اهي بدأت اول كذبة اهي

هبة : لا مش كذبة ولا حاجة دى حقيقة قول لهم يا غاوى
 (يدخل نور من الجهة اليمنى للمسرح ويتلفت حوله مستغربا منظر الأطفال
 السمان ... الذين يخرجون متفادين نور الذى يحاول أن يمسك كل واحد منهم
 وهم يصرخون ويبقى غاوى وهبة التى تلتفت فترى نور فتجرى نحو وهى
 تقول

مسرحية طائر الصدق : محمود حجاج

هبة : نور ..نور .. نور .. نور ..

نور : ايه .. ايه .. ايه .. ايه ..

هبة : الحمد لله انك رجعت بالسلامة .. بس خلى بالك لأن العصابة حيحاولوا يخطفوك تانى .. دول حاولوا يخطفونى أنا ونوسة .. بس نوسة ضربتهم علقة سخنة وهربوا منها .. انت هربت منهم ازاي ؟

نور : آه عصابة الكوسة الكذابة

هبة : كذابة برضه .. إيه حكاية الكذب اليومين دول ماشى فى البلد والا إيه ؟
نور (مفكرا) : على العموم يا هبة ماتخافيش انا عارف موضوع العصابة دى وعامل كل احتياطاتى
هبة : أيوه عامل كل احتياطاتك علشان كدة خطفوك بس همة عايزين يخطفوك ليه ؟

نور : علشان ... بس الاول احلفي انك تحافظي على السر.

هبة : سر .. سر .. يا سلام انا بأحب الأسرار قوى قول ما تخافش أوعدك مش حاقول لحد

نور : وعد شرف

هبة : وعد شرف

نور : اصلهم فاكرين انى عارف مكان الكنز

هبة (فى فرح) : الكنز ... وانت فعلا عارف مكانه ؟

نور : مكان إيه ؟

هبة : مكان الكنز

نور : كنز إيه ؟

هبة : مش أنت اللى قلت الكنز .. انت عارف مكان الكنز ؟

نور : أنا قلت كنز (مشيرا للجمهور) أنا قلت كنز ؟ .. أيوه طبعا عارفة وعارف مكانه وعشان كدة هربت منهم

يحدث غاوى : اما انا هربت منهم بحتة دين طريقة ... لا واية .. رحت
مشنكل الأول ... كدة والتانى خدته مقص حرامية والثالث سلم نفسه والرابع
خد ديله فى سنانه ويافكيك

هبه : طب قل لى عليه الله يخليك أحسن انا بقى لى يومين مش عارفه أتبجح
نور : تتبجحى فى إيه ؟ فى الفشر طبعا مش كدة ؟

هبه : لا يا أستاذ فى الكذب .. فشر إيه هو احنا بتوع الكلام الفارغ ده برضه
نور : وهو فيه فرق .. بين الفشر والكذب ...

هبه : طبعا فيه فرق كبير ... لأنه اللي بيكذب الناس مش بتعرف أنه بيكذب
إلا لما يجى حد يقول لهم على الحقيقة .. انما اللي بيفشر الناس كلها بتبقى
عارفه أنه بيفشر

نور : بس فيه ناس حتصدق اللي بيفشر

هبه : دول يبقوا مغفلين .. ومش معقول نتعامل فى المجتمع بمقاييس
المغفلين والا حنبقى مجتمع مغفلين

نور : يا سلام على الكلام الكبير ده .. ومين بقى المغفلين

هبه : المغفلين هممة اللي مش فاهمين الحياة صح .. بس ده مش موضوعنا

نور : ايه يا بنت موضوعنا .. عيب عيب .. هو احنا فيه بينا موضوع ..

هبه بكسوف : لا .. لا مش قصدى قصدى حتعمل ايه فى موضوع عصابة
الكوسة الكاذبة دى ...

نور : آه عصابة الكوسة الكاذبة دى ..

هبه (لغاوى) : ضربتهم نوسه علقه سخنة

نور : إيه نوسه دى كمان

هبه : نوسه صاحبتى .. انت مش عارفها .. دى نوسه .. دى جن مصور ..

(نور مشيرا الى غاوى)

نور : ومين دا اللي واقف هناك ده

هيه : ده غاوى
نور : غاوى إيه؟
هيه : غاوى حادى بادى
نور : حادى بادى بس
هيه : لا ... كرمب زبادى
نور (يضحك) : ها ها ها
هيه (تقلده) : ها ها ها
غاوى (مقلدا) : ها ها ها
نور : بس برضه انا عايز اعرف اسمه إيه ؟
هيه : يود ما أنا قلت لك
نور (لغاوى) : تعال يا شاطر انت انت واقف لوحذك بعيد ليه ؟
غاوى : اصلى مستنى الطيارة
نور (يضحك) : طيارة حتة واحدة والله هيه بتقف عندك ..؟
غاوى : لا حنتين .. حتة بتقف هنا وحتة بتقف هناك .
نور : وبعدين بعد كده تطير ... يا سلام هيه العنقاء
(ينظر إلى هيه ويتابع) ...
غاوى : أيوه العنقاء والغول والخل الوفى
نور : يا ولد يا مثقف أهو هو ده الفشر ...
هيه : آد صح ... زى ما أقول لك مثلا أنهم اخترعوا حفار يحفر الهواء
نور (ضاحكا) : يحفر الهواء يا سلام وعايزين يحفروا الهواء ليه ؟
غاوى : لازم علشان بيدورا علي إزاي يلاقوا وقت فراغ
(يضحكون ويقول نور)
نور : كده الموضوع فشر يعنى .. طيب خدوا دى تتصورى أنهم فى الخارج
اخترعوا زراعة بطيخ مربع
مسرحية طائر الصدق : محمود حجاج

هيه ضاحكة : يا سلام .. لازم عشان ياكلوه مرابعة
نور : لا عشان يبنوا بيه حائط البطيخ .
غاوى : حائط البطيخ .. وبيلزقوه بإيه ؟
نور : بيلزقوه بالشمام مع مع
هيه : والأغنياء بيلزقوه بالمنجة هعين هعين
غاوى : طيب سمعتوا على المنجة اللي بذرتها من بره
هيه : ها ها .. وبياكلوها إزاي دى
غاوى : بياكلوها من جوة .. ثلاث ههيع
هيه : بايخة ...
غاوى : طيب خدى غيرها
(يتجه ناحية نور ويقول) ...
غاوى : أنا مرة أكلت سمك ..
نور : وبعدين .. وإيه يعنى ما كلنا بناكل سمك
غاوى : وأكلت شوك السمك
نور : وإيه يعنى دى فشرة دى دا أنت عبيط بقي حد ياكل الشوك والنبي
غاوى : لا ... لسة .. وبعدين شربت مية
نور : أظن حتقول لى السمك عام فى بطنك .. قديمة
غاوى : ايوه مين اللي قالك يا خواجه ... السمك عام وأنا طلعت .
نور : استنى لا دي جديد دي وانت طلعت منين ؟
غاوى : من البحر اللي السمك فيه هو مش السمك بيعوم فى البحر برضه ؟
نور : استنى قول السمك عمل إيه بعد انت ما شربت ميه السمك عام فين؟
غاوى : عام فى الميه .. وأنا طلعت ... حد فهم حاجة (ينظر إليه نور
مستغربا ثم يقول) ...
نور : أنت اسمك إيه .. ؟
مسرحية طائر الصدق : محمود حجاج

غاوى (بعدم إهتمام) : غاوى.

نور : ايوه عرفت من هبه

غاوى : عرفت إيه ؟

نور : عرفت انك غاوى حادى بادى وكرمب زبادى .. بتلعبها كثير دي

غاوى : لا مفيش واو كرمب زبادى .. كرمب زبادى دى لزق على طول ورا بعضه .

نور : طيب يا سيدى ورا بعضه ورا بعضه .. خلصنى

غاوى : عايز إيه تانى ... ؟ وانا اخلصك هوو أنت علي ذمتي ؟

نور (مندهشا) : عايز إيه تانى بأسالك عن اسمك تقول لى عايز إيه تانى وأنت علي ذمتي عيب يا ولد

غاوى : ما أنا قلت لك على إسمى

نور : لا مقلتش ... انت قلت انك غاوى حادى بادى زى حكاية السمك عام

غاوى : ايوه غاوى حادى كرمب زبادى ... تمام .. وانا طلعت ده باين عليه مجنون هيه الناس ما لها ما بقتش بتفهم بسرعة ليه ؟

نور : انت بتحب اللعبة دى قوى ... وانا كمان

غاوى : لا ما بحبش اللعبة دى قوى ولا حاجة

نور : حاجة غريبة ...

غاوى : حاجة تزهمق ...

(هبه تضحك بشدة من هذا الموقف)

نور : يا أبنى أنا ما ليش دعوة أنت بتحب إيه وبتكره إيه ... انا كل اللى عايز اعرفه اسمك ..

(يتجه الى هبه التى تضحك .. يضرب نور كفا بكف ويضحك مع هبه ويدق معها كف قوى تتألم منه هبه ولكنها تواصل الضحك وفى نفس الوقت يدخل الإقزام واحدا وراء آخر وهم يلوحون بأيديهم) .

حابى : اهلا غاوى ..
 (يدخل سابى وهو يقفز على رجل واحدة)
 سابى : حادى بادى .. حادى بادى .. اهلا حادى ..
 يدخل بابى جريا وهو يقول :
 بابى : ردمب كبارى (يكررها)
 غاوى : كرمب زبادى ... يا بابى ... كرمب زبادى أنا حا لاقىها منك ولا من .
 (يشير إلى نور وتخرج الأقزام من المسرح ثم يعود بابى مرة أخرى ويقول :
 بابى : ردمب كبارى
 غاوى (يقهقه ويكرر خلفه)
 غاوى : ردمب كبارى ها ها ... ردمب كبارى ..
 (نور وكأنه يحدث نفسه) ...
 نور : يعنى انت اسمك كده ... غاوى
 غاوى (لهيه) : دا طلع بي فهم
 هبه (لغاوى) : لا خلى بالك .. هو بي فهم بس على مهله على ما تفرج
 (نور يبتسم وهو يقول)
 نور : بس يا ولد بس يا بنت عيب .. يا غاوى يا غاوى حادى بادى ... لعبة
 حلوة حنبقى نلعبها مرة
 غاوى : يوه ثانى .. لسه ما فهمش
 نور : لا فهمت حنبقى نلعب بأسمك ..
 هبه : لا يا أستاذ .. حنلعب بعيلته كلها ...
 (تدخل نوسة وتتجه مباشرة إلى هبه) ...
 نوسة : انتى فين يا هبه ... ؟ انا عماله ادور عليكى .
 هبه : اهلا يا نوسة .. تعالى اما اعرفك بنور
 (نوسة تتجه إلى غاوى) ..

نوسه (باحتقار) : هو دد نور
تجذبها هيه الى الجهة الأخرى وهى تقول :
هيه : لا .. لا .. دد نور ..
(نوسه تصافح نور بقوة تجعله يتألم .. وتقول له :
نوسه : اهلا اهلا يا معلم نور
نور (متألما) : معلم ..
تشير نوسه الى غاوى وتقول ..
نوسه : امال دد مين؟
هيه : مين ... دد ... آد ... غاوى
نوسه : غاوى إيه ... غاوى ضرب ... زيي ؟
هيه : حيلك بشويش شوية، كل حتة وكل حاجة عندك ضرب ضرب، دد غاوى
حادى بادى
نوسه : والله .. وانا كمان غاواها
(تنظر هيه الى غاوى وتقول له بصوت منخفض)
هيه : يا ابني دا انت اسمك ده مشكلة
نوسه : إيه دد .. هو اسمك كدد .. غاوى حادى بادى
غاوى : ايود فيه حاجة يا كابتن ...
نوسه : لا يا عم ... انت حر فى اسمك .. هو دد اسم
غاوى (بتحد) : آد اسم بقى .. غاوى حادى بادى كرمب زبادى كمان اذا كان
عاجبك ..
نوسه : آد انا فعلا بيعجبني الكرمب بس من غير زبادي .. يا عم روح غير
اسمك ده فى المحكمة .. دد مش اسم .. دد أكله .. او لعبه
هيه : مش مهم اسمه .. المهم دمه .. قصدى سيبك منه ومن اسمه دلوقتى
ينحنى غاوى وهو يبتسم لهبه ويشكرها وتستطرد هيه :
مسرحية طائر الصدق : محمود حجاج

هبة : المهم دلوقتى حنعمل ايه مع العصابة .. يا نور؟

نور : ما يهمكيش منهم .. أنا حا أتصرف معاهم ..

يؤدى عدة حركات كاراتيه فى مواجهة نوسه ويمثل مهاجمتها فتتحفز له وتأخذه على محمل جد .. وتجذبه من يده وتطرجه أرضا .. ثم تمد له يدها ليقف .. فيقف وهو يتوجع ويتحسس مؤخرته .. وتقول له نوسه :

نوسه : عامل لى نفسك بتاع كاراتيه .. قوم يا خويا قوم

نور (متألما) : آه يا ضهرى .. آه يا ورايا يا مفترية عملتى كدة ليه آه يانى .

نوسه (تنظر الى هبة وتقول معتذرة) : معلش يا أستاذ ... آسفة مش قصدى .

هبة (تتدخل قائلة) : ايه ده دا انت طلعت ورق امال كنت حتعمل ايه مع العصابة

نور : آه يا ضهرى آه يانى آه

يدخل من الجانب البعيد عن المجموعة عصابة (١) كلاصيمو وعندما يرى هبة وآخرين يختبئ خلف أحد ديكورات المسرح .. دون أن يراة أحد منهم .. وفى نفس الوقت تقول هبة لنوسه

هبة : تعالى يا نوسه نقعده هناك علشان يستريح من الهدر اللي أخده .. حرام عليكى ..

يمشي نور مستندا على نوسه وهبة حتى يجلس على الجهة الأخرى من نفس الديكور الذى يجلس خلفه عصابة (١) كلاصيمو.

تخلص هبة نفسها من نور وتبتعد عنه وهى تحرك كتفها الذى كان نور يستند عليه وهى تقول

هبة : أخ ... آه يا كتفى .. أنت أبديك إبيه مرزبة .. لازم نوضع خطة ... آه يا كتفى علشان نوقع بيها العصابة ونخلص منها ... دول مش عايزين

مسرحية طائر الصدق : محمود حجاج

يخطفوك أنت لوحدك .. دول عايزين يخطفوني انا كمان دلوقتى علشان عرفتم
السر

نور : آه ... سر ... الـ

تجري. هبه ناحية نور وتضع يدها على فمه وتقول له همامسة.

هبه : بلاش تقول .. كنز

(تستطرد وهي تشير الى نوسة)

هبه : وكمان عايزين يخطفوكي انتي

نوسة : لا يا حبيبتي يخطفوكوا انتوا لكن انا ... طاخ طيخ طوخ .. واحد

واحد اضيعهم كلهم ..

(تشير الى نور وتكمل)

نوسة : حتى اسألوه

نور : استنوا بس شوية لما الألم يروح، وانا احط لكم خطة ما تخرش المية،

آه ..

تتبادل هبه النظرات مع نوسة وغاوى نظرات ساخرة وهم يضحكون يشوح

لهم نور بيده ثم يقول بجدية

نور : أولا لازم نبلغ البوليس علشان يقبضوا عليهم وهمة متلبسين .. بخطفنا

هبه تضحك وتغنى بطريقة ساخرة :

هبه : متلبسين بخطفنا متلبسين بخطفنا

يا حبايب قلبنا مين يبقى زينا

يقلدها ساخرا - متلبسين بخطفنا .. ومين يبقى زينا

ايه يا بنتى الحكاية أنت شاديه ما تعرفيش تقفى على بعضك خمس دقائق.

يبرز نور رأسه مفكرا. ثم يقول وهو مندمج فى الألقاء

نور : متلبسين بخطفنا مين يبقى زينا نقاود احنا يا وك خلاصة حيننا

يا مفلسعين الهوى سلامات .. غنوة حلوة والله (يجلس لإكمال الكتابة وهو يفكر)

تتدخل نوسة : بوظت الفن يا أستاذ .. ده وقت تأليف ده ... ثم أن ده تأليف يا مفلسعين الهوى .. دى مغنى دى ده إسفاف يا أفندى أنت عايز تعلم الأطفال دول الأبرياء دول الأسفاف ما يصحش يا أستاذ .. عيب .. عيب عليك يا أفندى غاوى : عيب يا ولد ..

(نور يتنحج ثم يقول)

نور : مه آد .. طيب .. شوفوا نرجع للخطبة بتاعتنا الخطبة كالأنى .. نوسة وغاوى يروحوا يبلغوا البوليس وأنا وهبه نستنى هنا

نوسة (معترضة) : نبلي البوليس نقول له إيه ؟

نور : تقولى لهم أن فيه عصابة عايزة تخطفنى أنا وهبه

نوسة : يا سلام وأنا مالى .. وكمان انا ضربتهم مش حيعوزوا ينتقموا منى .. هبه (فى عصبية) : بس بقى هية الحكاية فتة وكل من هب ودب عايز حته خطف .

نور (ضاحكا) : حته فتة خطف حلوة ... ها ها

(يضع يده على احدى عينيه ويمشى يعرج وتلحق به نوسة وتضع يدها على كتفه ويمشون فى انحاء المسرح ويقول نور ونوسة تردد معه) ..

نور : الله يا محسنين الله ...

نوسة : حته فتة خطف الله ...

نور : الله يا محسنين الله ...

نوسة : خطفه يا متعصبين الله ..

(هبه تخطي كفا بكف وتقول) ...

هبه : هود احنا حششت .. والا انتوا بتعملوا ايه دلوقتى ايه التهريج ده ..

يضحك اللص بصوت عال ثم يخرج من المسرح عندما يدرك انه ارتكب خطأ
فى آخر لحظة قبل أن يلحظه نور الذى ألتفت على صوت ضحكتة وهو يقول :
نور : فيه حد اتحرك هناك ورا الحجر اللي هناك ده ..
(تتجه هبه ناحية الديكور الذى كان اللص مختبأ خلفه وتلف حوله) ..
هيه : ما فيش حد انت بس عندك شوية تهيؤات .. من الهدر اللي اخذته من
نوسه اعصابك مشدودة
نور : هدر ايه ده .. ؟
هيه : هدر نوسه وألا نسيته ؟
تضحك هبه ونوسه وعاوى ويلتفت نور اليهم فينتهز عصابة (١) كلاضيمو
الفرصة ويدخل مرة أخرى ويختفى فى نفس مكانه السابق .. وتقول هبه :
هيه : نسي الهدر ..
(يتحسس نور مؤخرته ثم يقول) ...
نور : بلاش كلام فارغ .. احنا دلوقتي عايزين نحط الخطه للى هيه علشان
نمسك العصابة متلبسين بخططنا ..
يشير إلى هبه وهي تستعد لكي تغني مرة أخرى أن تسكت ويقول أمرا
نور : أوعي تغنيها تاني
نوسه (تشير له) : وبعدين تاني فن إسفاف ..
نور : لا .. لا .. حرمت ...
هيه : طب حظ ..
نور : أخط أخط ايه
هيه : الخطه
نور : شوقي يا ستي أنا ونوسه ... نروح نبليج البوليس.

هبة : يا سلام .. إيه الشطارة دى !! إيه الحلاوة دى ! يعنى عايزين أنا
وغاوى نقعد هنا نستنى لما العصابة تيجى تخطفنا وانت تطلع بالكنت ()
تتوقف عن اكمال كلمتها ويقاطعها غاوى فى نفس اللحظة (....
غاوى : هوو أنا غاوى ..
نور : ايود يا بنى انت غاوى
غاوى : انا قصدى انى انا مش غاوى ..
نور : امال انت تبقى مين انت يا ابنى حتحيرنى معاك ليه ؟
غاوى : أنا غاوى الللى هناك الأولانى انا مش غاوى الللى هنا فهمت حاجة ؟
نور : لا مش فاهم .. اشرح لى أكثر ...
غاوى بضيق : يعنى هناك فى الأول انا كنت غاوى
نور : يعنى انت دلوقتى مش غاوى
غاوى : ايود الله ينور عليك ...
نور : طيب تبقى انت مين ... ؟
غاوى : انا غاوى .. غاوى والله العظيم غاوى
نور : امال بتقول ليه أنا مش غاوى .. يبقى تقعد مع هبة لغاية اما نرجع ..
الا اذا كنت ناوى تغيير اسمك وتخليه هرباوى ..
(تتدخل هبة قبل أن ينطق غاوى) ..
هبة : يود بقى .. هوو ده وقت هزار .. انا ونوسه الللى حنروح نبلف البوليس
وانت وغاوى تقعدوا هنا تستنونا ...
غاوى : هوو أنا غاوى ..
نور : تانى .. آه انت غاوى وحتقعد معايا ...
غاوى : طيب لو العصابة خطفتنى انا ونور ؟

هبة : العصابة مش مفروض يخطفوك .. لانهم ما يعرفوكش اذا شافوك مع نور حيسبود او حينتظروا لما تمشى علشان يبقى لوحده ويخطفوه براحتهم .. لا لا .. همه مش عايزين حاجة منك علشان يخطفوك ..

(يخرج عصابة (١) كلاضيمو من مخبئه ويقول وبصوت مرتفع) .. عصابة (١) كلاضيمو : تحليل صحيح ميه الميه ..

مرة أخرى يبدأ عصابة (١) كلاضيمو فى الخروج من المسرح بعد أن تدل حركته أنه أخطأ ثم يعود الى مكانه عندما يرى أن أحدا لم يلحظ وجوده) ...

تنحنى هبة قائلة : شكرا وبعدين انت يا أبنى مش غاوى مشاكل.

غاوى : انا غاوى حادى بادى وبتشكرينى على إيه ؟

هبة : الله امال مين اللي قال صح ... ؟

تتلفت هبة حولها ويخرج عصابة (١) كلاضيمو من مخبأه ويخرج من المسرح وهو يتذمر قائلاً

عصابة (١) كلاضيمو : دى مش شغلانة .. كل شوية حد يقول لى مين وفين ومش عارف إيه .. وابصر إيه .. إيه الحكاية هود ما فيش حرية كلام فى البلد دى .. كل شوية .. يدوروا ويلفوا واخرج استخبي وبعدين ارجع .. اخرج وارجع .. انت يا مخرج .. مش عارف اتكلم فى المسرحية على راحتى يا مخرج.

(يضرب الواقفون على خشبة المسرح كفا بكف فى تعجب .. ويقول نور)

نور : ده كلام مش فى النص ...

هبة تتجه الى الجمهور وتقول :

هبة : مين ده ؟

نور : أيوه مين ده ؟

غاوى : مين العبيط ده ... إيه اللي جايه فى المسرحية بتاعتنا.

(نوسه تشير بيدها مستغربة ثم تشير للآخرين بالأقتراب منها وهى تقول)

مسرحية طائر الصدق : محمود حجاج

نوسه : سيبكم منه يا جماعة خلىنا احنا نكمل المسرحية وهو حيرجع لعقله
بعد شوية .. كل واحد ليه دوره في الحياة .. كل واحد يعمل دوره وبس ..
علشان نلحق نروح برضه .. وانا مشاكل ومشاكل وعيال وطبيخ .. و .. و ..
و ..

هبة : لا بقى انا معترضة على الكلام ده .. انا كمان عايزة أغير دورى .. يا
مخرج .. مادام عصابة (١) كلاصيمو عايز يغير دوره ومعرض عليه .. انا
كمان معترضة عليه .. انا كمان معترضة على دورى ...

نوسه : معترضة يعنى إيه عايزة تبقى إيه يعنى ..

هبة : عايزة ابقى زيك ... حركة واكشن

تقفز فى الهواء مؤدية بعض حركات الكاراتية وتقع على الأرض

نوسه : وماله دى سهلة .. حالا دلوقتى ...

تصفر بفمها فيدخل أربعة رجال (اى عدد) ضخام الجسد يرتدون ملابس
مماثلة لملابس فتوات أفلام زمان .. ويضعون أساور من الجلد المطعم بالفضة
فى أيديهم .. تنظر هبة إليهم وإلى نوسه وتقول ...

هبة : ايه مين طفى النور ...؟

نوسه : يللا يا هبة ورينا .. لازم تضربى دول علشان نقدر نديك دور أكشن
.. وضرب وحركة زبي

(تتراجع هبة منكشمة وهى تعتذر) ..

هبة : لا مش قصدى زيك بالضبط يعنى .. إيه دول انتى جايبة الأفيال دى
مينين ؟

تتراجع هبة وتختبئ خلف نور ويتقدم الرجال خلفها وعندما يرى نور تقدمهم
يتراجع هو أيضا مبتعدا وهى تقول :

نور : يعنى كان لازم تعترضى وتعملى لى فيها معارضة وطنية .. لازم تعملى
روحك فلنوسه .. اديكى حتاخدى علقة سخنه .. كل واحد منا يعمل دوره وبس

واللى يخرج عن دوره حيبهدل روحه على الفاضى إذا كنتوا طيشة خليكو
طيشة وامشوا جنب الحيط وإلا تاكلوا علقة من الأربعة الكبار
تصفر نوسه بفمها مرة ثانية فيخرج الرجال الأشداء وبعد أن يخرجوا تخرج
هيه من خلف نور وتقول .. وهى تبرز عضلاتها.
هيه : همة فين دول وأنا أدشدش عضمهم
(تجرى هيه ناحية نوسه عندما تراها تستعد لأن تصفر مرة وترجوها قائلة)
هيه : لا ... خلاص والله خلاص حرمت حرمت ..
نوسه : اهود .. فى لحظة واحدة .. اصفر يرجعوا على طول
هيه : لا شكرا .. خلاص .. خلاص .. نرجع موضوعنا تانى احسن
يدخل عصابة (١) كلاضيمو متذمرا ويعود الى مخبئه وتشير نوسه للمجموعة
وللجمهور أن يتجاهلوه ويقول نور:
نور : اذ كنت بأقول نروح أنا وغاوى او أنا لوحدى أبلغ البوليس وارجع لكم
تانى
هيه : طيب اذا خطفوك وانت فى السكة .. فى السكة ... فى السكة حتعمل
ايه..؟ (تقلد المطرب محمد فؤاد) فى السكة .. فى السكة .. فى السكة ..
نور : عارفة لو عملوا كدة .. أنا حأعمل ايه؟
هيه : حتعمل ايه ؟
تنظر الى نوسه وتبتسمان
نور : حأصرخ والم الناس عليهم .. هية فوضى هية هيه : لا أنا باتكلم جد ..
نور : وما أقولش لحد .. قصدى وما أروحش لحد ..
تحتج نوسه وهيه على محاولة نور الغناء بيدها فيقول :
نور : خلاص .. خلاص .. روحى انتى ونوسه بلغوا البوليس .. وأنا
وغاوى حنفضل هنا لغاية ما ترجعوا لنا بالسلامة بس بسرعة ..
هيه : ماشى .. يللا يا نوسه ..

نوسه : يللا يا هبه ..

قبل أن تخرج هبه من المسرح تلتقى بفتاة وتسلم عليها بحرارة قائلة

هبه : أهلا يا فتحية .. ازيك وحشتيني ..

فتحية : أهلا يا هبهوبة يا حبوبة .. فينك من زمان ..

هبه : أبدا مشغولة شوية .. عصابات وخناقات ومشاكل كده .. ايه أخبارك أنتي الفنية؟

فتحية : بنعمل استعراض الشرطة النسائية .. اسمعى بكرة إن شاء الله عندنا بروفة جنرال .. ابقى تعالى انت وصحبك الأمور دي تتفرجوا على الاستعراض حلو قوى ..

هبه : إن شاء الله .. انا وصاحبتى .. آه أعرفك بنوسه أعز اصحابى فتحية : نوسه .. الله اسمك نوسه .. اتشرفنا .. اهلا يا حبيبتي لا اتشرفنا إيه اتنوسنا يا أختي .. ابقوا تعالوا سلام بقي احسن انا اتأخرت .. اشوفكم بكرة متنسوش ..

هبه : سلام .. حنجيلك إن شاء الله ..

تخرج هبه ونوسه من جهة وفتحية من الجهة المقابلة ويلتفت نور الى غاوى بعد أن تخرج هبه ويقول له :

نور : السمك عام وانت طلعت .. طلعت من بطنك يا مفترى .. بطنك بحر .. بيعوم فيه السمك وسمك متاكل كمان .. وكلت شوكة .. فيه حد بياكل شوك السمك .. يا فشار .. وبعدين السمك عام وانا طلعت

غاوى (متضايقا) : وانا مالى بيبك يا عم .. انا ماشى وسايبك للعصابة لوحدك هود انا بتاع عصابات والا حمل خبطة يابا

نور : يابا .. ايه الكلام ده بتجيبوه منين ..

يرى غاوى خارجا من المسرح بخطوات جادة سريعة فيقول له :

مسرحية طائر الصدق : محمود حجاج

نور : لا لا .. خليك يا غاوى متسبنيش لوحدى .. خليك راجل يا عيل ..
 حازر عل منك اذا سبتنى .. غاوى غاوى .. اسمعنى ارجوك ..
 يخرج غاوى من المسرح بعد أن ينظر الى نور بازدرء .. ويقف نور قرب
 الكواليس مناديا ..
 نور : غاوى .. يا غاوى .. غاوى .. خليك جدع وارجع .. يا غاوى .. مطلع
 غنوة حلوة .. غاوى يا غاوى يا غاوى ... خليك جدع وناوى
 يد ندن قليلا ثم يعود وينادى ..
 نور : يا غاوى .. غاوى ارجع انا خايف لوحدى حأعمل ايه لوحدى دلوقتى
 .. يا غاوى ..
 يتجه إلى منتصف المسرح .. وفى نفس الوقت يخرج عصابة (١) كلاضيمو
 من مخبئه ويقول :
 عصابة (١) كلاضيمو : الى العمل .. والمرة دى مش حتقلت مننا يصفر بفمه
 .. فيدخل أفراد العصابة واحدا وراء الآخر .. يشير لهم عصابة (١) كلاضيمو
 على نور الذى ينظر الى الجهة الأخرى التى خرج منها غاوى فلا يراهم وهم
 يتسحبون خلفه .. حتى يتمكنوا من لف حبل حول يديه .. ثم يكمنون فمه ..
 ويحملوه مرابعة بينهم ويخرجون من الجهة الأخرى للجهة التى خرج منها
 غاوى الذى يعود فى آخر لحظة قبل خروج العصابة وهى تحمل نور وهو
 يقول
 غاوى (من خارج المسرح) : انا رجعت يا نور بس علشان البنات وصعبت
 على
 يدخل ثم يتراجع غاوى للخلف عندما يرى أفراد العصابة وهم يحملون نور
 للخارج فيتوارى عن أعينهم حتى يخرجون من المسرح وهو يقول :

غاوى : دا أنا كنت فاكّر حكاية العصابة دى نكتة او كذبة من مبه .. انما دى
طلعت بجد .. واهود نور اتخطف فعلا .. لازم الحق مبه ونوسه واقول لهم.
انا السبب ماكانش لازم أسيبه لوحد .. لازم ألم باقى العيال علشان ننقذ نور
يمشى خطوتين ثم يعود. ويقول لنفسه ..
غاوى مفكرا : آه بس الأول لازم امشى ورا العصابة علشان أعرف حيودوا
نور فين بس المهم من غير ما يشوفونى ..
يتوجه الى الجمهور ويقول ..
غاوى : صح ... صح
يخرج غاوي .. و

وتنزل الستار ..

الفصل الثالث

المشهد الأول

تفتح الستار على هبه ونوسه تجلسان على دكة خشبية فى خلفية المسرح ..
وفى احد جانبي المسرح موضوع مكتب خشبى قديم مثل المكاتب الحكومية
الثقيلة .. وكريسيين من النوع العادى .. بعد فترة قصيرة تدخل فتحية ..
ترتدى ملابس شرطية برتبة ملازم أول .. وعندما تصل الى منتصف المسرح
ترفع يدها بالتحية لهبه وهى تقول بصوت مرتفع :

فتحية : يللا يا بنات .. يللا يا حسنات .. يللا يا نجدية بروفة جنرال
لإستعراض الشرطة النسائية ..

تشير بيدها جهة الكواليس ثم للأوركسترا وتقف خلف المكتب القديم فى حين
تبدأ الموسيقى خافته ويدخل معها طفل يرتدى ملابس اللصوص ويضع على
وجهه قناع .. يتسحب بهدوء وتدخل تتسحب خلفه فتاة ترتدى ملابس شرطية ..
فى منتصف المسرح يلتفت اللص خلفه فتتقضى الشرطية عليه وهى تقول :
حسنات : وقف عندك يا حرامى ..

الحرامى : مين .. مين .. ؟

حسنات : احنا الشرطة النسائية ..

(تدخل مجموعة فتيات خمسة إلى عشرة يرتدين جميعهن ملابس شرطة
وتتضم اليهن حسنات وفتحية بعد ان تسلم حسنات اللص لفتاة تأخذه وتقف به
فى خلفية المسرح بجانب هبه ونوسه وفى نفس الوقت تبدأ المجموعة فى
الغناء)

المجموعة :

أيوه احنا الشرطة النسائية	احنا الشرطة النسائية
أعمالنا فى كل المجالات	شرطة مهمة وقوية

أعمال ليها أهمية مين ينكر دور الشرطية ؟

من بعد دخولها العالمية

تتقدم حسناات وتغنى : أنا شرطة الجوازات تلاقينى فى المطارات

بأحلى بلاى لا يدخلها كل بتوع العصابات

احنا الشرطة النسائية

يفلت اللص من قبضة الفتاة ويجرى فى أنحاء المسرح مثيرة فوضى ثم يحاول

أن يتخفى فى ملابسه بأن يرفع ملابسه ويغطى بها رأسه ثم يغنى أيضا

والجميع يلفون المسرح بحثا عنه ..

اللس : أنا حرامسى ومسكونى وكنت عصابة شيكابونى

حرمت خلاص بس سيبنى مين بس يا ربى يخلصنى

من الشرطة الستات وأنا أتوب وأعيش فى ثبات

(يحرك وسطه)

دول بس بتسوع حركات فتحييه أو حسناات

(تتقدم حسناات وتنزل بيدها بقوة على كتف اللص وتقول له وهو يتألم بصوت

عال) ...

حسناات تغنى : بس اكتم خالص مس اما صحيح انك لص

خطوه فى الحجز يدور لما يشوفه المأمور

تسرع فتاة وتعلق لوحة مكتوب عليها الحجز .. وتسرع أخرى وتعلق لوحة

مكتوب عليها المأمور .. وتتقدم ثالثة وتأخذ اللص من حسناات وتخرج به من

الباب المجاور للوحة المكتوب عليها الحجز .. وبعد أن تعود الفتيات الثلاث

تكمل حسناات الغناء مع المجموعة .. :

المجموعة: احنا الشرطة النسائية .. شرطة مهمة وقوية..

احنا الشرطة النسائية

تتقدم فتحية الى منتصف المسرح ومن خلفها الفتيات يؤدين حركات قتالية راقصة

فتحية : أنا شرطة السجون وبأحافظ ع القانون

دا السجن دا انضباط لكل المجرمات

لو واحدة واخده حكم احنا نهذبها بحزم

علشان تخرج تكون فى المجتمع سوية

احنا الشرطة النسائية

المجموعة : احنا الشرطة النسائية

(تدخل فتاة جريا او تكون الفتاة واقفة اصلا على مكان مرتفع للمراقبة وتقول :

المراقبة : البية المأمور البية المأمور داير بيدور تفتيش فى الدور
تصطف الفتيات وتقف فتحية على الصف وظهرها للجمهور .. وتدخل فتاة
جميلة ترتدى ملابس شرطة برتية عالية .. تلف الفتاة حول الطابور ثم تقف
فى مواجهة الجمهور وتشير الى الطابور وتغنى ..

المأمور : أدي الشرطة النسائية أجمل شرطة يا عنية

تتنحى الفتاة وهى تعتذر بيدها للفتيات الواقفات فى الصف ومن يحتجن على
العبارة الأخيرة .. وتكمل بعد ان يهدأ ..

المأمور : الشرطة واجباتها كتير دايم دورها فى الأمن خطير

بتساعد كل شريف وبتحمى المسئولية

أدي الشرطة النسائية شرطة مصرية قوية

المجموعة : احنا الشرطة النسائية شرطة حقيقى ضرورية

شرطة حق وحريية احنا الشرطة النسائية

تتقدم نجدية وهى الوحيدة انش لا ترتدى ملابس شرطة

نجدية : وانا شرطة خاصة مباحث ونشاطى زى الباحث

من غير ما يحس اللص بأعرف كل ما يختص
بنشاط المجرمين حرامية مهربين بيتاجروا فى قوت الشعب
بس تبطلوا سلبية احنا الشرطة النسائية
المجموعة : احنا الشرطة النسائية شرطة حق وضرورية
شرطة حق وحريّة احنا الشرطة النسائية
هيه : تلتفت الى نوسه وتقول لها وهى تشير بيدها ..
هيه : نوسه .. نوسه .. نوسه ..
نوسه : ايه يا هيه .. هيه .. هيه
هيه : مش ده غاوى اللى هناك ده ..
نوسه : تنظر فى الاتجاه الذى اشارت اليه هيه .. وتقول فتحية
فتحية للمجموعة : برافوا يا بنات .. راحة ربع ساعة ونعمل بروفة ثانية ..
تنجّ ناحية هيه ونوسه فى حين تتذمر الفتيات
الفتيات : يوه .. تانى .. تعينا .. بروفة بروفة .. حاجة تزهق
فتحية (لهيه) : هاد ايه رأيكم؟
نوسه : اد غاوى والله ..
هيه : ياد انت كل ده ما شفتهوش .. فينك يا زرقاء ؟
فتحية : غاوى ايه يا نوسه .. قصدك مين .. المأمور ده بنت زينا ..
هيه (لفتحية) : لا .. لا .. قصدها غاوى حادى بادى
فتحية : مين .. فين .. انا مش فاهمة حاجة ..
هيه : تعالى .. ده غاوى حادى بادى صاحبنا .. كرمب زبادى أهود .. هناك
أهود
تنظر فتحية اليها .. وتهز كتفيها بعدم اهتمام .. وتنادى هيه
هيه : يا غاوى .. يا غاوى .. احنا هنا تعالى ..

غاوى : هبه .. نوسه .. احمدك يارب انى لقيتكم .. دا انا من امبارح بأدور
عليكم .. يتلفت حوله ثم يقول ..
غاوى : الحمد لله .. وكمان جبتم البوليس .. برافو شاطرين والله يللا بينا ..
بسرعة انا مشيت وراهم وعرفت الوكر بتاعه اللي خطفوا فيه نور
نوسه : يللا بينا على فين يا أبنى مش تفهمنا أيه الحكاية الأول
غاوى : هود انا ما قتلوكوش .. مش نور اتخطف امبارح.
هبه : اتخطف امتى ؟
غاوى : امبارح بعد انتوا ما مشيتوا على طول ..
نوسه : يا سلام وانت ما اتخطفتش ليه معاه ..؟!
يطرق غاوى فى حياء ويقول ..
غاوى : سبتة .. اهئ اهئ .. عيط .. صعب على .. فرجعت لكن العصابة
كانت أسرع منى .. رجعت متأخر .. العصابة ضربت ضربتها فى جناح الليل .
هبه : جناح الليل .. يا سلام .. موسيقى تصويرية .. بابابابام .. فالج.
غاوى : لا .. غاوى .. وانا كنت حاعمل ايه .. ده أحسن انى مشيت .. وإلا
ما كنتوش عرفتوا ان نور اتخطف ..
فتحية : مش تفهمونا ايه الحكاية علشان نشوف شغلنا .. ؟
هبه تنظر الى فتحية ثم تقول ..
هبه : جت لى فكرة .. ايه رأيك يا نوسه نروح كلنا أنا وأنت والبنات دول
وهمة كدة لا بسين شرطة نقبض على العصابة ..
فتحية : حيلك .. حيلك .. عصابة ايه .. احنا مش شرطة حقيقى علشان نقدر
نقبض على حد ..
هبه : معلش وحياتى يا حضرة الضابط فتحية علشان خاطر نور المسكين ده
دا زمانهم بيعذبوه ..
فتحية : ليه .. يعذبوه ليه ... ؟

نوسه : آد تلاقهم ولا حيعذبود ولا حاجة .. حياخدوا منه الفلوس اللي معاد ..
.. ويسيبود ..

هيه : لا حيعذبود .. علشان يعرفوا منه ..

(تتردد هيه .. فتقول لها نوسه) ..

نوسه : يعرفوا منه ايه يا هيه ؟

هيه : فى تردد - اصله عارف طريق .. طريق ..

يدخل الطائر متسحبا وتسال نوسه هيه ...

نوسه : عارف طريق ايه يا هيه ؟

الطائر (يظهر نفسه لهيه ويقول :

الطائر : طريق ايه يا هيه .. ؟ اياك تكذبى .. والا ..

هيه (تسقط كتفيها وتقول) : اصله عارف طريق الكنز

فتحية : الكنز

البنات (فى صوت واحد وهمية) : الكنز .. يبقى لازم نروح علشان ننقذ نور

غاوى : ايود الكنز. عمركم ما سمعتم عن كنز .. ايه ايه كنز. !؟

هيه : ايود كنز قال لى عليه نور انه يعرف طريقة .. الكلام ده قبل ما يموت .

نوسه : ايه اللخبطه دى يا هيه .. هود مات امتى .. ؟

غاوى : لا يا هيه ماماتش لسه .. ؟ دول خطفود بس ..

هيه : لا العصابة لازم حيعذبود لغاية ما يموتود .. علشان يعترف لهم على

الكنز

(تغمز هيه بعينها لغاوى ونوسه وهى تشير الى فتحية وباقي الفتيات يفهما

غاوى ونوسه هدف هيه .. وينضما اليها .. تدعى نوسه البكاء وتقول) ..

نوسه : يا عينى على شبابك يا نور ..

غاوى : يا أختى عليك يا صغتن ..

هيه : يا ميت ناقص كنز يا أخويا ..

غاوى : يا أختى عليك يا صغنى
هيه : يا شهيد الكوسة الكذابة يا عنيايا ..
فتحية : مش عارفة يا هيه .. أنا مكسوفه منك قوى والله بس احنا ما نقدرش
نخرج من الحارة باللبس ده .. وحتى اذا قبضنا على العصابة لازم حنوديههم
القسم .. وفى القسم بقى .. عينك ما تشوف إلا النور .. حيقبضوا علينا احنا
وجايز كمان يسيبوا العصابة
يلتف حولها باقى الفتيات بعد ان يتداولن مع بعضهن ويحايلنهن
الفتيات - معلش .. علشان خاطر الشباب المسكين .. والكنز
فتحية : ايود بس احنا ملناش اى صفة رسمية. حيقبضو علينا
هيه : ايود صحيح بيقبضوا على الشريف ويسيبوا الحرامى .. والحل نعمل ايه
غاوى : ليه بيقبضوا عليهم ليه .. هود ما فيش قانون .. ؟
هيه : فيه قانون يا غاوى .. بس غلط ان حد بلبس لبس من غير ما يكون
منتسب أو بيشتغل فى الجهة اللى ليها الحق تلبس اللبس ده فهمت
غاوى : لا .. ما فهمتش حاجة ..
نوسه : يعنى لازم تكون متخرج من كلية الشرطة علشان تلبس لبس ظابط
بوليس زى فتحة كده ..
غاوى : بسيطة .. ندخلهم من باب كلية الشرطة ويتخرجوا من الناحية الثانية
وبعدين يروحوا معانا ونقبض على العصابة ولما نقرب من قسم البوليس ..
يسيبنوا .. ويجروا ..
نوسه : يا سلام طيب ما العصابة كمان حيجروا .. حتعرف تتخافن معاهم ..
غاوى : لا .. انتى ونور .. وهيه .. وانا مالى بيكم .. هو انا فى نفخة ..
ممكن اجيب لكم اصحابى حنطوط ومظموظ وبظبوط .. ايه رأيكم
هيه : فكرة كويسة ..

يدخل من أحد جوانب المسرح شرطى على دراعة ثلاثة شرائط ويقول مندهشا
عندما يرى التجمع ..

الشاويش : ايه ده ايه ده ايه ده .. همه عملوا قسم شرطة هنا كمان ..

تنظر هبه الى فتحية وتقولان فى نفس اللحظة ..

هبه وفتحية : انتى بتفكرى فى نفس اللى انا بأفكر فيه ؟

تتصافحان ثم تتجه فتحية ناحية الشاويش وتقول له أمرد ...

فتحية : اسمك ايه يا رقيب وبتعمل ايه هنا .. ؟

ينظر اليها الشاويش متشككا .. ثم يجيب .. وهو يؤدى التحية

الشاويش : تمام يا افندم .. انا حسنين عوضين محمدين

فتحية : ايه دول كلهم .. سته .. كويس تعالوا اتوا الستة عايزينكم فى مهمة

سرية مهمة وخطيرة وإذا نجحت معانا حاوصى عليك علشان تأخذ شريط

مفهوم

الشرطى : سرية وهامة وخطيرة يا سنة نوسه.

نوسه : مالك ومالى يا شاويش يا أبو ثلاث شرائط .. يا جميل أنت

الشاويش : يضحك مكسوبا ..

نوسه : يا شوشو ..

(هبه وفتحية يتغامزان نوسه تلفت نظر الشاويش الى باقى المجموعة فيشد

الشاويش قامته ويتجه الى فتحية مؤديا التحية وهو يقول ..

الشاويش : هية دى العصاية يا حضرة الضابط .. ؟

نوسه مستنكرة : اود نو .. احنا مش لسه من شوية .. يا شوشو أنا وأنت

وهمه واقفين هنا وبنضحك ...

الشاويش يحاول ان يتجه ناحية نوسه ولكن تمنعه فتحية قائلة :

فتحية : لا .. عصاية ايه بس يا شاويش احنا حنروح للعصاية ببلاغ الست

والاستاذ غاوى ..

الشاويش : أيه غاوى ايه .. ؟ ايه الحكاية المهيبة دى .. قسم يطلع فى الحارة اللى أنا ساكن فيها وبعدين كل اللى فيه ستات .. وعصابة .. ونوسه .. وغاوى

نوسه : نعم يا شاويش .. بتنده ...

تأخذ هيه فتحية الى جانب عندما ينشغل الشاويش مع نوسه مرة أخرى وتقول هبه : اسمعى يا فتحية انا شايفة الشاويش ده بدأ يشك فى حاجة أحسن حل اننا نكلفته كدة بسرعة .. وناخده للعصابة وبكدة تبقى الشرطة فعلا معنا واحنا بنقبض على العصابة وبعدها انتى والبناات تخلصوا ..

فتحية : صح .. مضبوط ..

تتجه الى الشاويش وتقول له بلهجة أمرة ..

فتحية : يللا بينا يا عوضيين محمددين حسنين ..

الشرطى : حسنين عوضين محمددين يا أفندم ..

فتحية لباقي المجموعة وهى تشير بيدها ..

فتحية : القوة تتبعنى .. غاوى أنت المرشد .. تقدم وأنتوا الستة قدامي ياشوايشه

يخرج غاوى جريا وخلفه آخرون وتصرخ فتحية فى الشاويش.

فتحية : يللا يا رقيب أول .. واقف عندك ليه بالخطوة السريعة يتحسس الشاويش ذراعة قبل ان ينطلق وهو يقول ..

الشاويش : حاضر يا أفندم .. حاضر يا أفندم .. عجائب يا ولاد يا نوسه .. يادى النوسه ..

تتبعه نوسه وهى تقول ..

نوسه : نوستك بين ايديك .. يا شوشو .. انا وراك على طول ما تخافش ..

(تتبع هبه وباقي الفتيات فتحية والشاويش وعاوى وهن يضحكن .. وقيل
خروج هبه من المسرح تلتفت خلفها فترى مظموظ ومجموعته .. ومريم
وعليه ومجموعتهما .. فتشير هبه اليهم وهي تقول) ..
هبه : يللا يا جماعة .. تعالوا معنا .. علشان نقبض على العصابة .. عصابة
الكوسة الكذابة ..
مظموظ : قصدك هبه الكذابة ..
هبه : لا انا ما بقيتش كذابة .. انا باتكنم بجد ..
تشير ناحية خروج فتحية والشاويش والمجموعة وهي تقول ..
هبه : حتى تعالوا شوفوا اهم هناك البوليس وفتحية وكلهم رايعين علشان
ننقذ نور ..
مريم (بجزع) : همه خطفوا نور ... ؟
مظموظ : يبقى لازم ننقذه .. يللا يا جماعة .. يللا بسرعة علشان نلحقهم ..
حابي : طبعا طبعا لازم ننقذه ..
سابي : طبعا طبعا لازم ننقذه ..
بابي : (ينتظر قليلا ثم يقول) - بطعا عطبا زالم نندقه
يخرجون جميعا خلف هبه في طابور منتظم .. وبعد لحظات يعود بابي ويقول
للجمهور
بابي : طبعا لازم ننقذه ..
تطفأ الأنوار ويتم تغيير المشهد والديكور ..

المشهد الثانى

يفتح الستار على مخزن مملوء بكراكيب قديمة، عدة فرد كاوتش وكراسى قديمة وفى الجانب الخلفى يجلس نور على كرسى فوتيل ضخمة قديم مكتف اليدين والقدمين بحبل .. نائما .. وفى وسط المسرح ترابيزة مربعة يجلس حولها أفراد العصاية يلعبون دومينو ..

يقول عصاية (١) كلاضيمو وهو يخطط القشاطر بقوة على الترابيزة :

عصاية (١) كلاضيمو : اللعب .. خذ دى ..

عصاية (٢) بلاليمو : انا جعان .. مش عايز اللعب .. كفاية لعب .

عصاية (٣) شلاضيمو : وانا كمان جعان ..

عصاية (٤) شمهر : وأنا كمان جعان ..

عصاية (١) كلاضيمو : خلاص قوم يا شمهر .. جيب لنا أكل.

عصاية (٤) شمهر : حاضر .. (يقوم ويخرج من المسرح)

عصاية (٣) شلاضيمو (بعد لحظات من خروج شمهر) : بس انت يا

كلاضيمو ما ادتلوش فلوس علشان يجيب اكل ومش معقول هيسرق .. هوو

احنا حرامية ؟

عصاية (١) كلاضيمو لا .. يسرق ليه .. خذ يا واد يا شلاضيمو اديته الجنيه

ده .. بسرعة .. الحقه وماتوا لنا حاجة ناكلها ..

عصاية (٣) شلاضيمو : حاضر .. حمامة ..

يخرج من المسرح جريا ويقول عصاية (١) كلاضيمو

عصاية (١) كلاضيمو : نكمل احنا لعب يا بلاليمو .. على ما يرجعوا الجوز

عصاية (٢) بلاليمو : .. الجوز الخيل ..

عصاية (١) كلاضيمو : والعربية ..

يضحك بصوت مرتفع فينتبه نور ويقول ..

نور : يا ترى خير .. ما تضحكونى معاكم .. انا جعان انتوا مش ناويين
تأكلونى، والا حتسبونى أموت من الجوع ..
عصابة (١) كلاضيمو : ايود صحيح .. احنا ما قلناش للجوز يعملوا حساب
الراجل ده ..
عصابة (٢) بلاليمو يرمى قواشيط الدومنيو ويقول :
عصابة (٢) بلاليمو - طيب قوام قوم حصلهم وقل لهم ..
يخرج عصابة (١) كلاضيمو .. خلف أصحابه ويبقى عصابة (٢) بلاليمو مع
نور .. الذى يتململ فى جلسته ويقول :
نور : انا تعبان قوى من القعدة دى .. اسم الكريم إيه ؟
عصابة (٢) بلاليمو - بلاليمو ..
نور : بلا إيه .. ؟
بلاليمو - بلاليمو بلاليمو .. إيه مش عاجبك .. ؟
نور : لا عاجبنى قوى .. واصحابك اسمانهم زيك كدة .. ؟
عصابة (٢) بلاليمو: اللى خرج ده دلوقتى اسمه كلاضيمو ..
نور : كلاضيمو .. كويس معقول شوية .. والاتنين التانيين ؟
عصابة (٢) بلاليمو - اسمه شلاضيمو .. والثانى اسمه .. شمهر ..
نور : شلاضيمو .. وشمهر .. انعم واكرم .. الاخير ده انا ما أحبش أتتك معاد
فى اى حاجة .. شمهر هه .. أظن ده كان تابع مامته معاد .. اكيد .. علشان
كده سمود كده
بلاليمو : مامته بس .. ده كان تابع الحى كله .. ؟ ده شمهر يابا .. من
صغره وكل الناس تشوفه من بعيد تبعد على طول - ده شمهر يابا .. شم إيه ؟
نور : هر .. طبعا لازم يبعدوا .. كفاية ريحته .. كان بيهر على روجه كثير

تقفز هبه من شباك مرتفع قليلا خلف كومة الكاوتش دون ان يراها عصابة (٢) بلاليمو ولا نور .. عصابة (١) بلاليمو يشك انه سمع حركة فيقوم من مكانه ويتجه الى الشباك الذى قفزت هبه منه وهو يتابع كلامه مع نور .. عصابة (٢) بلاليمو : آه وانت عرفت إزاي .. دول كانوا بس يشموا أنه جاى من بعيد .. يطيروا على طول من سكتة من وهو عيل انت فاهم ايه انت .. ده شمهر يابا .. شم ايه .. ؟

نور : هر .. انت بتعمل ايه عندك .. ؟

عصابة بلاليمو (٢) : اصلى سمعت صوت .. هنا يمكن فار .. يعود دون ان يرى هبه ويجلس فى مكانه وظهره لهيه .. التى تظهر برأسها خلف الكاوتش فترى نور وتحاول ان تلفت نظره اليها بأن تقذف عليه بعض الأشياء .. (حله او كبشة او كرسى بلاستيك صغير خاص بالأطفال ..) اشياء ملفته للنظر .. يتنبه نور لوجود هبه .. وفى نفس اللحظة ينظر عصابة (٢) بلاليمو الى نور فيرفس نور الأشياء التى قذفتها هبه بقدميه حتى لا يشك بلاليمو فى شئ يضحك بلاليمو فى بلاءة ويقول.

عصابة بلاليمو (٢) : - ايه انت بتلعب كورة .. لعب معاك.

يشوط الحلة فى اتجاه نور وهو يقول ..

عصابة (٢) بلاليمو : انت فاكرك نفسك حتعورنى بالحلة دى .. جون .. انت فاهم ايه انت .. ؟ وانت مربوط كده الربطة ديه .. ؟

هبه من مخبتها : انت فاهم ايه انت ... ؟

عصابة (٢) بلاليمو - انت مال صوتك رفع كدة ليه .. ؟

نور يقلد هبه : انت فاهم ايه انت .. يتحنج ثم يكرر العبارة بصوته

نور : انت فاهم ايه انت .. اصلى عطشان من فضلك شوية ميه

عصابة (٢) بلاليمو (مستعرضا عضلاته) : بص انت تعورنى .. انت

نور : يا جامد .. ايه العضلات دى .. ورينى اكرر ..

يستعرض عصابة (١) بلاليمو عضلاته ثم يناول نور كوب ماء ويعود إلى مكانه .. يجلس وهو يقول :

عصابة (٢) بلاليمو : انت فاهم ايه انت .. ؟

تضحك هبه وتقفز في الهواء فيشير لها نور ان تختبئ .. وتشير له هبه ان يحاول ان يوزع عصابة ٢ .. فيوافقها ويقول لبلاليمو

نور - : امال فين اصحابك الثلاثة .. ؟ سابوك ولا ايه

عصابة (٢) بلاليمو : لأ راحوا يجيبوا أكل.

تشير هبه الى نور مرة أخرى أن يتخلص من بلاليمو فيقول لها نور

نور : استنى امال انا باعمل ايه

بلاليمو : بتعمل ايه فى ايه.

نور : قصدى انت مستنى ايه

بلاليمو : مستنى لما يرجعوا.

نور : طيب ايه اللى يضمن لك انهم يرجعوا

بلاليمو : ازاي دول قالوا انهم راجعين

(يبدو عليه الشك)

نور : ما هما ممكن يجيبوا الأكل وياكلود وتتسوح انت فى الباي باي

ويرجعوا وتقع أنت جعان أنا قلبى عليك ..

بلاليمو : لو عملوا كده حيبقى معاهم الجنيه لسه ...

نور : يا سلام .. ليه همه ما معهمش غير جنيه واحد .. يأكلوا ويرجعوا

ويقولوك ما أكلناش .. حتعرف منين ..

بلاليمو : طيب والجنيه ..

نور : جنيه ايه يا بنى آدم .. حيوروا لك واحد زيه .. او .. يقول لك ضاع ..

انت فاهم ايه انت ؟

بلاليمو يهرش رأسه مفكرا .. ثم يقول ..

مسرحية طائر الصدق : محمود حجاج

عصابة (٢) بلاليمو: لو عملوا كده يبقى نهارهم مش فايت دا انا جعان جعان
يخرج جريا من المسرح .. وتخرج هبه من مخبئها وتجرى إلى نور وهى
تقول :

هبه : استاذ نور استاذ نور .. متخفش احنا جينا كلنا ومعانا البوليس وفتحية
وحسنات ونجدية .. ومظموظ واخواته التخان والاقزام.

تتجه ناحية الجهة التى خرج منها بلاليمو ويقاطعها نور :

نور : هبه انتم عرفتم طريقى منين .. كويس برافو .. يللا فكى فكينى قبل ما
يرجعوا علشان نقدر نهرب بسرعة ..

هبه : لا .. لا .. نهرب مين يا استاذ .. احنا لازم نقبض عليهم متلبسين
وهمه هنا معاك وانت متكتف كده .. لازم البوليس يشوفوك وانت مربوط يا
حرام ..

نور : اعقلى يا هبه .. انتى مش حتقدرى عليهم لوحدهك .. فكينى قوام .. وانا
اشيلك ونهرب من نفس الشباك اللى انتى نطيتى منه يللا بسرعة ما تضيعيش
الوقت ..

هبه : لا .. مش حنهرب .. اسمع بس الخطه ..

نور : خطه ايه .. اسمعى اما اقولك فكينى احسن لك .. احسن والله اذا ما
فكتينيش .. عارفة .. عارفة حاعملك ايه .. ؟

هبه ضاحكة : حتعمل ايه .. ؟ تقترب منه وهى تقول ..

هبه : حتعمل ايه وانت مربوط .. ولا تقدر تعمل اى حاجة .. حتى شوف ..
تبدأ تزغزغة وهو يضحك ويقول :

نور : هاها .. بس يا بنت .. هاها .. عيب .. هاها .. كفايه كدة .. هاها ..

تكف هبه ويتنهذ نور .. وتقول هبه ..

هبه .. اصل انت مش عارف .. ده كل الناس هنا برد ..

البوليس ومريم ومظموظ وحنطوط وبظبوط والفرقة كلها لابسين شرطة ..
والشاويش أبوست أدوار .. اقصد اسماء .. ولازم دول كلهم يبقوا شهود ..
يعنى يشوفوك وانت مربوط وبعدها افكك .. انت فاهم ايه انت

نور : طيب دخلهم بس بسرعة

هبة : احسن استنى شوية لما العصابة ترجع

نور (محتجا) : لا .. لو العصابة رجعت مش حتقدرى عليهم لوحذك

(تنظر هبة اليه ثم تتجه ناحية الباب وهى تقول ..)

هبة : طيب طيب .. ما تزعلش .. انا حافتح لهم الباب عشان يخشوا يشوفوك

بس .. همه اسماءهم ايه .. ؟

نور - مين .. ؟

هبة العصابة ..

نور : شلاضيمو .. وشمهر .. وكلاضيمو .. وبلاليمو ..

هبة : اما اسماء .. بلا ايه ..

نور : بلاليمو ..

هبة : اسمع انا جاتلى فكرة حلوة .. ايه رأيك نعمل زى فيلم أنور وجدى ..

انت تندد على العصابة واحد واحد .. وأنا البسهم طراطير ..

نور : طراطير ايه .. فيروز كانت بتلبسهم براميل .. كل واحد برميل .. وهنا

ما فيش براميل .. الحمد لله .. ده كلام ده لا يا ابنتى فكينى الله يخليكى.

هبة : خلاص مش مهم .. المهم دلوقتى أنك تسترخى خالص لغاية ما يرجعوا

.. أنا رايحة أفتح الباب للبوليس والشلة ..

نور (محتجا) : استرخى .. الشلة .. يا بنتى هى لعبة .. فكينى الله يعمر

بيتك

هبة : ايه يا أستاذ أنت حتشحت تانى .. ده بقت عادة بقى ..

يتعالى صوت أفراد العصابة خارج المسرح فتعود هبة جاريا من عند الباب
جهة نور وتقول له :
هبة : دول رجعوا .. ايه رأيك نعمل دلوقتى زى فيلم (فيروز) انت تناديه
واحد واحد وانا البسهم حاجة فى رأسهم ..
نور : فيروز ايه يا هبة دلوقتى .. ده وقته .. ثم إن هنا مفيش براميل يبقى
حتلبسيهم إيه .. ؟
هبة : تتلفت حولها : البسهم .. البسهم .. البسهم ..
تتناول الحلة من الأرض وتقول :
هبة : البسهم دى .. الحلة دى يبقى شكلهم اوريجينال خالص
نور : لا ما تنفesh .. حلة إيه دول عايزين حاجة كبيرة تدخل فى رأس الواحد
منهم ما يعرفش يشيلها .. تكتفه كويس ..
هبة تتلفت حولها مرة ثانية .. ثم تقول :
هبة : البسهم كرسى ..
نور : مش حتقدرى تشيليه تقيل عليكى .. فكينى وانا اشيله معاكى ..
تشير له أن لا .. فيقول لها :
نور : يا شيخة روحى كده ..
هبة : ماشى اروح منين .. ؟
نور يشير لها متضايقا .. فتقول :
هبة : خلاص عرفت البسهم إيه .. البسهم دى ..
تحاول ان ترفع كرسى .. فردده كاوتش فلا تستطيع وفى نفس الوقت يأتها
صوت عصابة (١) كلاضيمو من خارج المسرح يقول ..
عصابة (١) كلاضيمو : اهو فيه صوت جوده فيه حد جوده عند نور .. ازاي
انت يا بلا تسيبه .. ؟ تعالوا بسرعة نشوف مين جوه
تختبئ هبة ويدخل أفراد العصابة فيجدوا نور يغنى ..

نور : جعان يا خلق وفيين الاكل .. من يجيبود جعان

عصابة (١) كلاضيمو : مين اللي كان هنا .. معاك ..

عصابة (٢) بلاليمو : مين اللي كان هنا .. معاك ..

عصابة (٣) شلاضيمو : مين اللي كان هنا معاك ..

عصابة (٤) شمهر - مين اللي كان معاك هنا ..

ينظرون اليه لأنه غير العبارة ويقول نور وهم يبحثون في أنحاء الغرفة نور :

محدثش معايا هنا .. فيين الأكل انتوا حتموتونى من الجوع والا إيه ..

يلمح عصابة (٣) شلاضيمو طرف فستان هبه فيقول :

عصابة (٣) شلاضيمو : البنت هناك أهية ؟

يجرى ناحية هبه ولكنة يتعثر فى الحلة ويقع ويقع فوقه باقى أفراد العصابة ..

وتجرى هبه ناحية الباب ونور ينده عليها ان تفكه فتترك الباب وتحاول ان

تفك نور ... وتستأنف الجرى وأفراد العصابة خلفها يكبلهم نور واحدا وراء

آخر .. معطيا الفرصة لهبه لتقف فوق الكرسي وتطل من الشباك وتنادى

أصدقاءها ..

تستأنف هبه الجرى وأفراد العصابة خلفها وتفلت من تحت يد عصابة (١)

كلاضيمو .. وتغزل (بمعنى تدعى أنها ستذهب فى اتجاه وتجرى فى اتجاه

آخر كما فى كرة القدم) عصابة (٣) شلاضيمو .. وتجد وسط الكراكيب كرة

قدم فتشوطها بين أقدام عصابة ٢ بلاليمو فيرتبك ويتعثر فيها وترد الكرة إلى

مبهفتشوطها فى بطن عصابة ٤ شمهر .. تجرى وتقف تحت الشباك (

المفروض وجود ثلاثة شبابيك .. تقف هبه تحت الشباك الأوسط ..)

ويتقدم ناحيتها اللصوص الاربعة معا .. بعد أن يلقي عصابة ٤ الكرة ناحية

هبه قائلا ..

عصابة (٤) شمهر : اشغطلى يا حذوة ..

تمسك هبه بالكرة وتحركها فى عدة اتجاهات كأنها تلعب كرة سلة ويلتفت افراد

العصابة مع حركة يدها فى كل مرة وهى تقول

هيه : هوب .. هنا .. ها .. خد يا نور

يلتفت افراد العصابة الاربعة جهة نور مما يعطى الفرصة لهيه لتختفى خلف

كومة الكراكيب القديمة .. وفى نفس اللحظة ينقض أفراد العصابة على هبه

فيصطدمون بالحائط ثم يستديرون وهم يتسائلون

عصابة (١) كلاضيمو : هيه راحت فين .. ؟

عصابة (٢) بلاليمو : هيه راحت فين .. ؟

عصابة (٣) شلاضيمو : هيه راحت فين .. ؟

عصابة (٤) شمهر : انتو بتدوروا على بنت صغيرة طول كده ؟

افراد العصابة الثلاثة معا : ايود

عصابة (٤) شمهر يتقدم خطوة للأمام ويتبعه الثلاثة اخرون ثم يقول مشيرا

للاتجاه الذى تختبئ فيه هبه ... وهو يغمض عينية

عصابة (٤) شمهر - اهيه هناك ..

قبل ان يتحرك الثلاثة فى اتجاه هبه يقفز الافزام الثلاثة كل قزم فوق ظهر فرد

عصابة .. وتصيح هبه بأسم فرد العصابة الذى يركبه القزم

يقول حابى وهو متعلق فوق ظهر كلاضيمو ..

حابى : فسحنى يا كلا .. كلا ايه ... ؟

هيه : كلاضيمو ...

سابى : فسحنى يا شلا .. شلا ايه

هيه : شلاضيمو ...

بابى : فسحنى يا بلا ...

عصابة (١) بلاليمو : انت بتشتدنى وعاليزنى اشمك ... ؟

هيه : هود مشتمكش .. دا بيدلحك ..

مسرحية طائر الصدق : محمود حجاج

بابى بلهجة امرة : انت مش اسمك بلاليمو ..
عصابة (١) بلاليمو : بلاليمو .. ايوه
بابى : خلاص فسحنى يا بلا
سابى : يا حابى .. حابى تيجى نعمل سباق ..
حابى : سباق الحمير .. قصدى الحصنة ..
يشير الى شمهر ويقول ..
حابى : موافق ..
يقول شمهر : لنفسه بصوت عال
عصابة (٤) شمهر : فرصة نستغل السباق عشان نهرب
يلتفت الى باقى العصابة ويقول لهم
عصابة (٤) شمهر : عشانتمو الفككانتمو .. فاهنتو ...
عصابة (١) كلاضيمو : انتو فانتانتو .. (يوافق برأسه)
عصابة (١) بلاليمو : فكرنتو باننانتو .. (يوافق برأسه)
عصابة (٣) شلاضيمو : دد ايه ده ايطالى دد يا شمهر ...
عصابة (٤) شمهر : اسكت انت .. اذا كان بلاليمو فهم حاجة غريبة والله .
عصابة (٤) شمهر لحابى - موافق ..
يوقفهم شمهر صفا واحدا .. ويقول حابى مشجعا ..
حابى : اوعى تكسفننى يا كلا ..
سابى : شلضم .. شلضم ...
بابى : يقرص بلاليمو فى خده وهو يقول ..
بابى : بلا هوه اللى حيسيق .. مش كده يا بلا ..
يعطى شمهر اشارة لبدء السباق .. وتناول هبه بابى خرزانه تجدها فى
الكرايب يضرب بابى بلاليمو على مؤخرته بالخرزانه وهو يستحثه ...
بابى : شى يا بلا ..

يجريان كلاضيمو وبلاليمو فى حين يقف شلاضيمو ويقول محتجا .. شلاضيمو
عصابة (٣) شلاضيمو - ماقولتوش السباق من فين لفين ..
يخطف شمهر الخرازنه من يد بابى ويجرى ليضرب بها شلاضيمو
فيطلق عصابة (٣) شلاضيمو جريا خلف الآخرين خارجا من المسرح تتردد
هبة خطوتين وشمهر لا يعرف اين يذهب حيث تظن هبة انه يحاول الامساك
بها .. ولكنها تنطلق جهة نور وتبدأ فى فك الحبال التى تكتف نور وهى
تهوش عصابة (٤) شمهر الذى يحاول القفز من الشباك ولكنه يرى الشرطى
فيعود ويقول لهبه عصابة (٤) شمهر : انا كنت عارف انك عاملة حسابك
هبة وهى تسد أنفسيها بيدها: شوف يا أخ شمهر .. مش الأخ اسمه شمهر
برضه ؟

عصابة (٤) شمهر : ايوه أى خدمة ... ؟
هبة تنتهى من فك نور ويضيف شمهر :
عصابة (٤) شمهر : اى خناقة .. خطف .. سرقة .. ومن غير عشرة فى المية
خدمة .. ؟ لامؤاخذة ..
هبة : بالذمة دى عصابة دى .. ؟
شمهر : ايوه عصابة امال احنا بنلعب .. ؟ لامؤاخذة ..
هبة : آد .. ما هو واضح اهود .. وحضرتك واقف كده ليه لا مؤاخذة ..
عصابة (٤) شمهر : انا حر واقف فى بيتنا .. ليه لا مؤاخذة
هبة : وهتقف عندك كتير لا مؤاخذة .. ؟
عصابة (٤) شمهر : اقف زى ما انا عاوز .. لا مؤاخذة .. انا مرة وقفت فى
الشارع سنتين.
هبة : سنتين فى الشارع .. ؟
عصابة (٤) شمهر : ايوه سنتين فى الشارع

نور : غريبة مع اسمك ده انت لازم تخش من الشارع كل يوم مرتين على الأقل

هبة : وما استحمش سنتين ... ؟

عصابة (٤) شمهر : لا أنا باستحمى كل عشر سنين الحرامية ما بيستحموش

هبة : لا كثير .. ليه بتستحمى كثير كده يا مسكين .. ؟

عصابة (٤) شمهر : مامو مش دائما بالاقى الحمام فاضى باروح مطبق ..

هبة : يعنى اذا لقيت الحمام مشغول تقعد عشر سنين تانية من غير ما

تستحمى

يدخل أفراد العصابة الثلاثة جريا ومن خلفهم الأقزام الثلاثة ويقول كلاصيمو

عصابة (١) كلاصيمو : الحق يا شمهر يا خويا .. البوليس برد أنا قفلت

الباب فى وشهم ..

يتصاعد صياح الأطفال فى الخارج وهم ينادون

الأطفال : يا هبة .. يا نور ..

تقفز نوسة من الشباك وهى تصرخ وتودى بعض حركات الكاراتية وأفراد

العصابة ينظرون اليها مندهشين .. وتقول هبة لها :

هبة : خلاص .. يا نوسة .. خلاص يا حبيبتي أعصابك. الحكاية خلصت ..

انتى بس افتحى الباب للبوليس وخلي البوليس يدخل تخرج نوسة .. وتعود

بعد لحظات ومعها الشاويش ويندفع خلفهم باقى الأطفال فيصطدم مظموظ بأحد

افراد العصابة ويوقعه على الأرض ويحدث مرج على المسرح ونوسة تسد

طريق الخروج وتضرب من يحاول ذلك .. ويختبئ حنطوظ خلف كومة

الكاوتش ويمسك فى يده قدوم خشبي كبير يضرب به بلاليمو على قدمه كلما

يقتررب منه وأخيرا تدخل فتحية ومجموعة الفتيات معها ويحطن باللمصوص ..

وتتوال فتحية للشاويش ..

فتحية : خد الأربعة دول يا شاويش .. هيه دى عصابة الكوسة اللي مدوخين
البلد .. واحنا جايين وراك ..

الشاويش : لا يا أفندم لازم المجنى عليه يجى معانا علشان نقفل المحضر يا
أفندم

نور : انا يا شاويش .. يللا انا جاي معاك بينا ..

نوسه : تقذف حبل للشاويش وتقول

نوسه : خد الحبل ده اربطهم بيه ... ؟

يربط الشاويش الحبل فى يد افراد العصابة الأربعة ويجذبهم منه وهو يقول ...

الشاويش : يللا يا متهم منك له ...

يخرجون ويتبعهم نور وباقي الأطفال وتحتضن هبه فتحية وتقول

هبه : متشكرة قوى قوى يا فتحية متشكرة قوى يا بنات ..

تخرج فتحية وخلفها باقي الفتيات ويتركن هبه وحدها على المسرح .. يدخل

الطائر بهدوء خلف هبه ثم يضع يده على كتفها فتفرع وتلتفت اليه ثم تقول ..

هبه : ايه ده فزعتنى يا زرقاء .. فين بقى الكنز .. انت وعدتلى انه بعد ثلاث

ايام حتكشف لى الكنز .. فاتوا الثلاث تيام الحمد لله فين هود بقى أنت قلت لى

اذا ما كذبتش ثلاث ايام حتورينى مكان الكنز .. لازم توفى بوعدك ..

يطرق الطائر منتظرا وتدخل نوسه ومعها باقي الأطفال وتدخل نجوى قائلة :

نجوى : هبه .. برافو قبضتى على العصابة كلها .. انا خلاص حاتق فيكى بعد

كدة على طول

على : وانا كمان يا هبه مش حاقول عليكى يا وارمة تانى، قصدى كذابه

(يردد باقي الأطفال كلهم معا)

الأطفال : ايود يا هبه مش حنقول لك يا كذابة بعد كده وكلنا حناتق فيكى

الطائر : هو ده الكنز يا هبه .. هو ده الكنز الحقيقى .. انك تستمرى كده بدون كذب .. علشان تكسب ثقة الناس وحبهم لازم تفضلى كده على طول من غير كذب ..

هبه : فعلا .. فعلا ثقة الناس وحبهم دول همه اعظم كنز فى الدنيا .. هبه ونوسه والطائر : (يغنون معا ومعهم باقى الأطفال) ..

هو ده الكنز الحقيقى الذى بينور طريقى
نكسب الدنيا معانا مستمرين فى الأمانه
واللى يكذب يبقى خائن مستحيل يبقى صديقى
هو ده الكنز الحقيقى الذى بينور طريقى
يخرجون واحد وراء اخر وتستمر الأغنية مع

إسدال الستار.

سيرة ذاتية للمؤلف والأعمال المنشورة :

الاسم الكامل : محمود النبوى محمد حسام الدين حجاج

اسم الشهرة : محمود حجاج

المؤهلات : بكالوريوس تجارة - جامعة حلوان - عام ١٩٧٠

دراسات عليا : دبلوم نظم معلومات الحاسب الآلى

أكاديمية السادات للعلوم الادارية - عام ١٩٨٩

دورات أخرى : مقدمة الكمبيوتر - لغات الكمبيوتر (بيزك - كوبول)

من الجامعة الأمريكية بالقاهرة

عضوية جمعيات واتحادات :

- عضو اتحاد الكتاب المصرى بالقاهرة
- عضو نادي القصة
- عضو نقابة التجاريين بالقاهرة
- عضو مجلس إدارة جمعية محبى الفنون الجميلة بالقاهرة سابقا
- عضو جمعية الحاسبات السعودية
- عضو نادى الأهرام للكتاب
- عضو المنتدى الثقافى المصرى
- عضو منتدى المثقف العربى
- عضو رابطة الزجاجالين وكتاب الأغاني

شهادات التقدير : حصل المؤلف علي شهادات تقدير من
الجهات التالية :

- أولا : شهادة تقدير من النادي الثقافي بالمعادي
ثانيا : شهادة تقدير من منتدى المثقف العربي
بالقاهرة
ثالثا : شهادة تقدير للتميز في الشعر من المؤتمر
العالمي للشعر بواشنطن D.C -
الولايات المتحدة الأمريكية
رابعا : كأس التفوق من المؤتمر العالمي للشعر
بواشنطن D.C - بالولايات المتحدة
الأمريكية عن القصيدة المكتوبة بمناسبة
أحداث ١١ سبتمبر ٢٠٠١

المؤلفات المنشورة : _

أولا : الكتب العلمية :

- ١ - علم نفسك مقدمة أساسية فى مبادئ علوم الكمبيوتر (عربى - انجليزى) .. الناشر المؤلف عام ١٩٨٦ توزيع مكتبة عالم الكتب بالقاهرة ٣٣ش. عبد الخالق ثروت
- ٢ - الكمبيوتر والإدارة للمدير الناجح (مع أمثلة تطبيقية فى تحليل النظم) .. الناشر المؤلف عام ١٩٨٩ توزيع مكتبة عالم الكتب بالقاهرة ٣٣ش. عبد الخالق ثروت
- ٣ - مجلة كمبيو طفل - أول مجلة علمية لتبسيط علوم الكمبيوتر للأطفال - العدد الأول ١٩٩٦ النشر ورئيس مجلس الإدارة والتحرير للمؤلف

- ١ - رواية الموتى يثأرون - عام ١٩٨٦ الناشر المؤلف
توزيع عالم الكتب شارع عبد الخالق ثروت - القاهرة
- ٢ - رواية رشوة ما تمت - عام ١٩٨٧ الناشر المؤلف
توزيع عالم الكتب بالقاهرة
- ٣ - تعالى الى (شعر) - عام ١٩٨٧ الناشر المؤلف
توزيع عالم الكتب بالقاهرة
- ٤ - رواية أطول نصف يوم فى التاريخ - عن ملحمة حرب أكتوبر
١٩٧٣ المجيدة الناشر المؤلف عام ١٩٩٥ توزيع عالم الكتب
بالقاهرة
- ٥ - الحرق الأوسط - مجموعة قصص قصيرة عام ١٩٩٥ الناشر
المؤلف توزيع عالم الكتب بالقاهرة
- ٦ - حكاية الغوريلا رواية بوليسية كوميدية للأطفال عام ٢٠٠٠
الناشر المؤلف - توزيع عالم الكتب بالقاهرة

ثالثاً : تحت الطبع :

- ١ - الجزء الثاني من رواية " الموتى يثأرون :
- ٢ - العدد الثاني والثالث من مجلة الأطفال " كمبيو طفل "
- ٣ - مجموعة قصص قصيرة بعنوان " .. من ذهب "
- ٤ - ديوان شعر بالعامية
- ٥ - ديوان شعر بالفصحى
- ٦ - كتاب في نقد الشعر بعنوان " سياحة نقدية "

يطلب من مكتبة عالم الكتب

٣٣ شارع عبد الخالق ثروت - بالقاهرة

أو من المؤلف محمود النبوي حجاج

٢١ شارع المقياس بالروضة القاهرة

ت : ٣٦٤٧١٩٩ مكتب وفاكس : ٧٢٠٠٤٨٨

موبايل ٠١٢٢٦٢٠١٠٤

رقم الإيداع : ٢٠٠٤/١١٤٨٦

الترقيم الدولي : I.S.B.N.

977-17-1531-3